



七十二峰足徵集卷七十七

武峰吳定璋友篁菟錄

分湖葉啓祥善百編訂

張祐

祐字承吉清河人元和中以詩名見重於時或薦諸天子書奏不下受辟諸侯府性狷介不容物輒自劾去嘗過吳門泛舟太湖愛洞庭之勝卜居久之後遷曲阿載龍渚竒石遊嶺南載羅浮石筍其清異如此生平不蓄善田利產惟嗜水石恒悉力

致之身後故姬遺孕不免凍餒友人顏弘至萱陸  
 魯望龜皮襲美日皆過廬興嘅為詩弔之且以諷  
 故交之不恤其家者陸云勝華通子共悲辛荒逕  
 今為舊宅隣一代交遊非不貴五湖風月合教貧  
 魂應絕地為才鬼名與遺編在史臣聞道生平偏  
 愛石至今猶泣洞庭人

西江行

日下西塞山南來洞庭客晴空一鳥度萬里秋江  
 碧惆悵異鄉人偶言空脉脈

車遙遙

東方矐矐車軋軋地色不分新去轍閨門半掩牀  
 半空斑斑枕花殘淚紅君心若車千萬轉妾身如  
 轍遺漸遠碧山迢迢水宛宛馬蹄在耳輪在眼桑  
 間女兒情不淺莫道野蠶能作繭

題平望驛

一派吳興水西來此驛分路遙經幾日身去是孤  
 雲雨氣朝忙蟻雷殺夜聚蚊何堪秋草色到處重  
 離羣

晚夏歸別業

古岼扁舟晚荒園一徑微鳥啼新菓熟花落故人  
稀宿潤侵苔鬢斜陽照竹扉相逢盡鄉老無復話  
時機

小松

何處劬雲烟新移此館前碧姿塵不染清影露長  
鮮聳地心纔直凌雲操未全可悲人自老何日是  
千年

題松汀驛

山色遠含空蒼茫澤國東海明先見日江白迥聞  
風鳥道高原去人烟小徑通那知舊遺逸不在五  
湖中

愛妾換馬

樂府解題云舊說淮南王所作淮南王疑即  
劉安也古辭今不傳世傳韋鮑二生以妾接  
馬之事云韋生下第東歸同憇水閣鮑有美  
妾韋有良馬鮑以夢蘭小倩佐歡飲酣停盃  
閱馬軒檻韋曰能以人換任選殊尤鮑欲馬

之意頗切密遣四絃更衣盛裝頃之而至乃  
命勸韋酒歌曰白露濕庭砌皓月臨前軒此  
時去留恨含思獨無言又歌送鮑生酒云風  
颭荷珠雖暫圓多生信有短姻緣西橋今夜  
三更月還照離人泣斷絃韋乃命牽紫叱撥  
以酬之俄有紫衣冠二人自閣西升階而來  
二生恐悚闔戶窺之一人長髯曰足下賦云  
斜漢左界北陸南躔白露暖空素月流天可  
謂光絕對曰何不賞風霽地表雲歛天末洞

庭始波木葉微脫今夜月如晝可以爲賦長  
髯曰向聞妾換馬之事可以爲題以彼傾城  
求其駿足爲韻長髯曰彼佳人兮如瓊之英  
此良馬兮負駿之名將有求於駿足亦何惜  
於傾城香暖深閨未厭天桃之色風清廣陌  
曾憐噴玉之轂希逸曰原夫人以矜其容馬  
乃稱其德旣各從其所好諒何求而不克長  
跪而別姿容休耀其金鈿右牽而來光彩頓  
生於玉勒文通曰步及庭砌効當軒墀望新

恩懼非吾偶也戀舊主疑借人乘之香散綠  
 駿意已忘於鬢髮汗流紅領愛無異於凝脂  
 希逸曰是知事有廢興用有取舍彼以絕代  
 之容為鮮矣此以軼羣之足為貴也買笑之  
 恩既盡有類求之據鞍之力尚存猶希進也  
 賦訖行十餘步已失故祜有愛妾換馬之什  
 云

一面妖桃千里蹄芳姿駿骨價應齊試牽玉勒辭  
 金棧催整花鈿出繡閨去日豈無沾袂泣歸時還

有頓銜嘶嬋娟躑躅春光裡揮手搖鞭楊柳隄  
 綺閣香銷華廐空忍將行雨換追風休憐柳葉雙  
 看翠却愛桃花兩耳紅侍晏永辭春色裡趨朝休  
 立漏教中恩勞未盡情先盡暗泣長嘶兩意同

夢江南

行吟洞庭句不見洞庭人盡日碧江夢江南紅樹  
 春

懷古

碧樹吳州遠青山震澤深無人蹤范蠡烟水暮沉

東山寺夜

寒色蒼蒼老栢風石苔清滑露光融  
半夜四山鐘磬盡水晶宮殿月玲瓏

楓橋

長洲苑外草蕭蕭却筭游城歲月遙  
惟有別時今不忘暮烟疎雨過楓橋

孟才人歎

故國三千里深宮二十年一聲河滿子  
雙淚

落君前自倚能歌曲先皇掌上憐  
新教何處唱腸斷李延年二章祐所作宮詞也傳入宮  
禁武宗疾篤目孟才人曰吾即不諱爾何爲  
哉指笙囊泣曰請以此就縊上憫然復曰妾  
嘗藝歌請對上歌一曲以泄其憤上許乃歌  
一教河滿子氣亟立殞上令醫候之曰脈尚  
溫而腸已絕帝崩柩重不可舉或曰非俟才  
人乎爰命具櫬輓至乃舉祐爲孟才人歎序  
曰才人以誠死上以誠命雖古之義激無以

過也

偶因歌態咏嬌嚙傳唱宮中十二春却爲一轂河  
滿子下泉瀆弔舊才人

感春申君

薄俗何心議感恩諂容卑迹賴君門當時浪說三  
千客寂寞無人殺李園

讀池州杜員外杜秋娘詩

年少多情杜牧之風流仍作杜秋詩可知不是長  
門閉也得相如第一詞

孫覲

覲字仲益別號鴻慶居士晉陵人蘇文忠公軾守  
常州覲方五歲即爲器重愛之如子第政和間進  
士由詞臣歷吏戶長貳凡章奏制誥表諭疏議皆  
明辨駿發世爭傳誦後以口語忤執政出守平江  
未幾罷政慕郡西山水之勝泛舟太湖登包山卜  
居林屋洞之陽名其廬爲休寓室又避地於馬蹟  
之耿灣作室一區自製上梁文邑乘載之所著鴻  
慶集



湖汛上冢繫舟丁山田舍小憇

清溪三百曲一片春風綠  
郊屋有人家窈窕闕深  
竹老去耽田里寓目快  
新矚風漪卷翠綃雲巘  
鏤蒼玉尋盟喚白鷗解  
佩贖黃犢獨嘯無一人  
傳教滿空谷

妙光庵

孤烟抱水村落日滿雲樹  
亂山如連環楊柳是門  
處青繚竹谿灣翠點苔石  
路鐘魚寂無聲白日掩  
僧戶茗盃酌雲腴香篆擢  
烟縷坐穩不知夕炯炯

山月吐

過洞庭

千尺雲山屹嵩華浪湧雲屯天  
一罉榜舟夜傍鼉  
鼉窟杖藜曉入鷄豚社處處  
人家橘柚垂竹籬茅  
屋青黃亞臺殿紺紅墜半山  
兩腋清風策高架牛  
羊出没怪石走蛟龍起伏蒼  
藤掛飢鼠窺燈佛帳  
寒華鯨吼粥僧跌下世味飽  
諳真嚼蠟老境得閒  
如嚼蔗山靈知我欲歸畊  
一夜築垣應繞舍

過沈仲嘉園亭題贈

包山美人構亭子巋然屹立深園裡窓近斷巖見  
怪石壁臨絕磴聞流水亭中一架古人書知是群  
經及諸史桐葉滴露下陰砌橘花隨風飄靜几美  
人素厭世俗語有語利名須洗耳衡門反關高枕  
眠紅日三竿猶未起

贈善慶堂主人夏元富

居士藏修洞庭野新架虛堂殊瀟洒閑門開傍橘  
柚林萬顆千株映青赭居士優游每不出左列圖  
書右盞筯逢迎自覺青眼衆來往應知白丁寡莓

苔經雨上石砌蘿薜迎風拂簷瓦素聞平生賸積  
善餘慶當傳累世下醉揮健筆賦新詩輒贈堂中  
樂居者

胥口

江濶卧人影山長送馬蹄渚蓮紅尚斂沙草翠相  
迷高樹藏雲直疎篁壓雨低酒醒渾不記端是武  
陵谿

舟過湖汊泊丁山二首

鷄犬三家市蓬蒿一畝宮蘿牽籬幕翠籜隕砌堆

紅宿鳥來還去微泉咽復通幽尋殊未已落日滿  
疎桐

日下殘紅歛烟升積翠重鷗輕沒浩蕩魚樂自從  
容野饁迎秋穫鄰謳相夜春田翁有真意一笑酒  
中逢

洞庭善慶堂置酒賦寄十韵

幽絕小蓬壺參差見畫圖亂青山四出一碧水平  
鋪洲蘂紅相照沙茸細欲無蓮房駢百子橘圃聚  
千奴布穀休催種提壺且勸酤楚腰飛燕燕秦缶

和烏鳥便旋驚回雪連娟引貫珠西風催畫鷁落  
日詠驪駒浩蕩川原隔驚呼歲月徂寥寥清夜夢  
直擬控搏扶

南山寺

千丈雪根蔭此邦沉沉寒影卧秋江潭空映日蒼  
虬動烟暖翹沙白鷺雙夢覺灘聲喧客枕吟餘竹  
色滿僧窓詩成絕叫層樓上聽我洪鐘萬石撞

天

黃蘆吹雪滿汀洲萬里烟波接素秋數點征帆雲

際落一輪斜日水中流長橋踏月隨幽伴小閣浮  
天賦遠遊便買一舟爲泛宅此生何必老菟裘

次韵王子欽立春

歲晚驚呼身已老天涯流落首空回便將酒力推  
愁去且放春光入眼來人語嘻嘻爭鬪草宮花閃  
閃艷粧梅雪消水煖春江動綠漲葡萄萬斛醅

清明日與范季實諸公集胥澤民別墅

水滿雙飛白鷺花深百轉黃鸝寒食清明過了一  
川烟艸離離

兀兀三杯外困昏昏一枕春融酒醒落花風裡夢  
回啼鳥殺中

望道場山塔

碧玉旋螺插暮烟遙看桂子落僧前試尋白水田  
頭路一葦橫江浪接天

吳門道中

數間茅屋水邊村楊柳依依綠映門渡口喚船入  
獨立一簑烟雨濕黃昏

一點炊烟竹裡村人家深閉雨中門數聲好鳥不

知處千丈藤蘿古木昏

梅二首

北風剪水玉花飛翠袖凌寒不自持  
脈脈含情無一語水邊籬落立多時

纖纖蘿蔓牽茆屋細細苔花點石缸  
夢斷酒醒山月吐一枝疎影卧東窻

葉夢得

夢得字少蘊湖州人

宋史文苑傳云蘄州吳縣人

少登進士第

有經世大略紹聖四年授丹陽尉徽宗朝用蔡京

薦以婺州教授累遷至翰林學士遇事敢言京在

相位絕不阿附而於欲用童貫宣撫陝西取青唐

稱引祖制爭之甚力京不從高宗初遷翰林學士

兼侍讀戶部尚書夢得陳待敵之計請駕南巡阻

江為險以備不虞既遷尚書右丞紹興初詔為江

東安撫大使兼知建康府壽春等六州宣撫使奏

移統制官韓世清屯建康崔增屯采石闕阜等分

守要害劉豫入寇擊敗之八年復除江東安撫制

置大使兼知建康府行宮留守奏防江措畫八事

選將練兵團結鄉勇金人犯含山却走之又犯壽州夢得遣子模將千人守馬家渡金兵不得渡初建康屯兵歲費錢八百萬緡米八十萬斛榷貨務所入不足以支至是禁旅與諸道兵咸集夢得得兼總四路漕計以給饋餉軍用不乏故諸將得悉力以戰軍毅大振海寇朱明猖獗八閩騷動詔加觀文殿學士移知福州兼福建安撫使統御前將士便道之鎮勦撫便宜行事數月間平寇五十餘郡上章請老特遷一官提舉臨安洞霄宮尋拜崇

信軍節度使致仕卒贈檢校太保宣和中築別室於弁山多致竒石羅列參錯於濠梁竹木間號曰石林嘗遊洞庭買屋數椽嘯歌偃息日事著作今東山葉巷有石林公讀書室仲子程居之卒葬東山今所稱程公墓是也葉氏世譜云葉氏自縉雲遷湖州凡再世夢得之曾祖贈金紫光祿大夫諱綱葬蘇州寶華山遂爲吳郡人而居湖州者以烏程縣霅川中書里爲定著居蘇州者以吳縣東洞庭震澤鄉爲定著王士禎云石林晁氏之甥學有

師承筆力雄邁猶有東京盛時風氣非南渡諸人所及按經籍志石林集百卷今所傳止建康集八卷餘率湮沒幸避暑錄石林燕語放言玉礪等書猶存說部中豈一人之身其著書傳不傳亦各有數耶石林之學尤邃於春秋觀集中答王從一教授二書可見

石林送模歸弁山并示僧宗義為余守西巖者

自我離山間忽已兩改月飢人不忘食未坐先已說家童挾書至驚起慰愁絕推尋到鷄犬問說窮

曲折此生豈多為一壑萬慮滅可能復犬錯更鑄

八州鐵江東領汝歸馬蹄輕初不恨觸熱殷勤報

松竹吾豈成久別

端居探幽竒自謂畧已徧昨登西山巔雄絕昔未

見溪湖莽吞吐雲物紛百變乃知十年閒尚或遺

勝踐巢成輒棄去我豈秋社燕築南山絕頂亭為

吾課童僕開闢盡二面莫言羊腸險徑小煩屢轉

杖藜不用扶吾脚猶爾健

生長在山間從翁守蓬戶人言膏梁子粗免汙純

袴官居無多戀暫止復遽去家法恐未傳此心良  
 已素義禪晚從我似識此間趣西巖鬱欽岑久斷  
 俗子路聊持山中節爲我主留務封陞際湖海雲  
 月皆所部

題公耄惠崇溪山

荒林翳宿莽脫木寒無烟不知三間茅中有幾醉  
 眠山遠尚見雪江空欲浮天歸舟定何許滄波方  
 渺然

懷西山

西山十畝強高下略不齊嵌空抱竒秀上有凌雲  
 梯小屋八九間茅簷敢辭低所欣面勢好老稚適  
 扶携密竹轉修徑老松成故蹊仲冬景氣肅碧艸  
 猶萋萋仰觀天宇大四顧渺回溪徐行信足力未  
 畏成顛躋用意各有適孰云無町畦平生幾濡首  
 末路多噬臍不作巢幕燕肯從觸藩羝胡爲濫麾  
 鉞坐聽鳴鼓輦外物委蟲臂全生思馬蹄可能三  
 徑草歸路老更迷

遊支硎贈才上人



澤國鍾下流有山獨西南標竒惜明眼夙昔多窮  
探腹背炫金碧鐘魚半精籃支郎放鶴地妙解無  
餘談高木氣未炎綠陰正清酣我懶倦登陟茲行  
咤猶堪幽尋雖云初佳處默已諳久欲謝塵滓往  
同彌勒龕平生術九九晚識前三三才也實可人  
窮年玩烟嵐胸中有定水萬境潛包含嚴霜掃頰  
紫老榦餘梗楠噉蔗要自佳食茶亦云甘坐斷方  
丈室天花雨氤氳笑我窘世網何如老眠蠶我今  
已解縛真理蚤自耽但恐愛山水多求尚成貪願

借待月嶺重開石頭庵偃松久傲兀碧琳故澄涵  
言尋覺庵路更欲從徧叅

長橋

長橋跨空水彌漫北望吞天去無岍洞庭自湧東  
西山驚濤忽起行人斲禹功千年在坤輿東南大  
浸惟五湖如何寇來不少限鐵馬萬騎翻長驅

二月六日敵騎犯歷陽方出師客自吳江來  
有寄聲道湖山之適趣其歸者慨然寫懷

松江浪靜如鏡平菰蒲長春秋水生晴沙回雁久

未到坐想白鷗憎眼明五年辜負釣船約故人疑  
我真逃盟豈知塵纓不易濯正想滄浪之水清朝  
來鐵馬晴江北中流疊鼓雲濤傾樓船十萬下采  
石旗燾滅没天戈橫書生事業今乃爾授鉞孰敢  
辭專征豈無傳檄走飛騎漫復長嘯登高城文思  
天子民父母大度未忍鑿竒兵澶淵一矢安在也  
明日倘或傳諸營

再任後遣模歸按視石林

岩石三年別君恩未許歸從誰尋艸徑爲我欸荆

扉舊繞山千疊新添竹一圍故人如見問端欲掛  
朝衣

白髮萱堂上孩兒更共懷弄孫那得見將母竟難  
諧已絕功名望猶疑出處乖此心終未穩何處復  
安排  
插架環千軸傳家有舊書展舒慙几案涼曝闕庭  
除破屋防懸溜殘編足蠹魚好須重檢校鑰鎖莫  
令疎

細路穿南嶺新松幾許長毋庸馳馬足祇似轉羊

腸便作高亭好初非亂石妨兩溪渾在眼端欲見  
帆檣

方參議用前韵記嘗過余石林次韵答之

不復襄陽寫孟亭草齋人道是丹青那知客自從  
文舉但怪山能養伯齡世味無多真潦倒歸心欲  
寄每丁寧遙聞徑竹添新影更想巖花作遠馨夜  
鶴未應真怨別江鷗須信久忘形地偏故逐淵明  
遠風好常隨御寇冷癡坐正憐塵滿案醉眠終倚  
石爲屏瀛洲學士煩追賦尚記滄波換洞庭  
弁山後即

太湖正與洞庭  
東西兩山相望

府中即事

行歌坐嘯往來頻俯仰之間迹已陳可是猶思建  
鄴水却應喜近洛陽塵十年徧閱三行闕  
余自維揚臨安  
及今凡三至  
駐蹕之地 四海奔馳一老臣未有夷吾在江左  
柴車空換兩朱輪

蔡子因相過留踰月

解作江山一月留仲文儒雅更風流欲知爵躍心  
能喜正愛蟬連語不休築室君方論並舍  
子因約同居雪

上歸山我已辦扁舟交親四海今餘幾萬事傷心  
付白頭

章幾道將歸小飲懷誠父

中年甚畏別交親况復雲山舊結隣澗谷何時同  
笑語干戈已老更風塵少留對榻聊分坐多病持  
杯漫幾巡賈傅長沙知健否洞庭波浪渺無津

李彌大

彌大字似矩按吳縣志邑人崇寧間進士嘗為顯謨閣直  
學士朝散郎遷尚書紹興二年守平江蒞郡閱月

而罷隱居太湖之洞庭山築室林屋洞側名無礙  
庵自為記磨崖刻之遂號無礙居士又有道隱園  
易老堂架浮亭其基址尚存吳江迮君耕石好竒  
嗜古之士也乾隆壬戌九秋與余泛太湖登縹緲  
峰入包山陟林屋訪李尚書遺跡俱在荒烟蔓艸  
中無礙庵老屋數間頽垣如醉不堪投足慨然久  
之及登曲巖暘谷竒石萬狀勢皆飛動喜甚志欲  
買此山小隱其間尚友無礙居士余曰果爾則吾  
亦移家作比隣矣迺相與訂十年之約今迮君方

仕宦秦中圖功邊徼正不知何時得遂住山之願也偶錄李詩念及記之

散步山村喜風俗淳朴小詩紀之

山居時散步所接多畊夫或揖或不揖頗忘爾與吾陰晴話愁喜豐約道有無電訊歎人壽風波驚世途超然心不累朝市何有乎

親舊有問山中事者示之以詩

試與問秦漢人家總不知餐霞雲竇冷卧月石牀歌流水天常洗桃花春自遲年年深洞裡閒着一

枰碁

昔白樂天爲蘇州太守游洞庭山題詩翠峰寺有笙歌畫船之句紹興壬子彌太守平江閱月而罷片帆來游首訪翠峰追懷古昔擬樂天體聊記其韵時異事別各遂所適之樂

爾

山浮群玉碧空沉萬頃光涵幾許深梵刹樓臺嗟海蜃洞天日月浴丹金秋林結綠留連賞春塢藏紅次第吟擬泛一舟追范蠡從來世味不關心

無礙泉詩

并序

水月寺東入小青塢至縹緲峰下有泉泓  
 澄瑩澈冬夏不涸酌之甘涼異於他泉而  
 未名紹興二年七月九日無礙居士李似  
 矩靜養居士胡茂老飲而樂之靜養以無  
 礙名泉主僧願平為煮泉烹水月芽喜為  
 之賦

甌研水月先春焙鼎煮雲林無礙泉將謂蘇州能  
 太守老僧還解覓詩篇

胡松年

松年字

宋蘇州太守詩載震澤編

華山寺詩

并序

余罷自平江謀居霅川過洞庭西山寓觀  
 音院德雲堂坐挹湖山勝槩數年兵火之  
 禍何所不至獨此地清涼安穩豈非林屋  
 洞天金庭玉柱為神仙窟宅有山靈默護  
 持耶余願掛冠終老此間也  
 小舟乘風飛鳥過萬頃雲濤縱掀簸此行要是快

平生無數青山笑迎我山根隱約見人家  
槿籬茅屋埋烟霞宛似秦人種桃處川原遠近紛香葩  
杖藜徑踏華山去試問蓮開今何許路迷絕壑蔭松筠  
筠身到半山聽魚鼓道人爲我開雲堂是中境界  
渾清涼幽磬時和野鳥語飛泉暗瀉巖花香文書  
照眼本吾事鴈鶩著行敗人意造物似憐厭世囂  
挈置湖山煩一洗何人夜呼隱去來向來得喪真  
山岬金庭玉柱永不改人間劫火空飛灰

王逢

逢字原吉江陰人世居黃山弱冠有文名至正中  
嘗作河清頌行臺憲司交薦之皆以疾辭避地梁  
鴻山自號席帽山人又居馬蹟之古竹灣松之青  
龍江烏涇結茅灌圃息影草間詩文署名最閑園  
丁明初以文學錄用其子掖爲通事令掖以父老  
泣請命罷之顧秀野元詩選云原吉之詩志在乎  
元則成其爲元遺民而已有梧溪集

震琳辭

震澤中洞庭樂石也

震遺琳八琅音夔擊節獮應唵却西琥謝南金樂

哉幽深

大貢小貢二山

大貢如大人小貢如小臣大人方正笏小臣亦垂  
紳太湖七十二而此我所珍清淑萃間氣端厚凝  
風神嶽露蓮一朵海偃月半輪遠分馬跡秀近奪  
峨眉真岫幌敞素夕雲蓋擁高晨深容虎豹隱幽  
絕狐兔隣軍障雖相望邈若越與秦我行柯村外  
紫翠忽鮮新不無靈異棲飛度招隱淪洶洶白水  
波杳杳清路塵芳蓴被中沚采之淚盈巾父老昧

知識謂我諸侯賓我豈諸侯賓均是天王氏

銀瓶娘子辭

娘子宋岳鄂王女聞王被收負銀瓶投井  
死祠今在浙西憲司之左逢感其節孝敬  
爲之辭

蒼梧月落烏號霜寒泉幽凝金井牀綺疏光流大  
星白夢驚萬里長城亡女郎報父收圉園匍匐將  
身贖無所官家聖明如漢主妾心媿死緹縈女井  
臨交衢下通海海枯衢遷井不改銀瓶同沉意有



在萬歲千秋露神采魂今歸來風冷然思陵無樹  
容啼鵑先王墓木西湖邊

宋婉容王氏辭

徽宗在北四太子請王婉容妻黏罕子上  
遣之婉容大哭曰何忍一身事兩主就與  
中奪刀自刎死太子嘆異擇地葬之且爲  
立碑曰貞婦冢事載俞文豹吹劍錄

二宮有警無嚴蹕賤妾徒爲虜雛匹假如青冢向  
黃昏不若金刀照白日白繻一縷願隨終烟沙漠

漠霜雪容令人想見旌貞石氣敵雙高湖上峰

趙文敏公山水爲董竹林山長題

公於畫左題云至大三年六月望日爲吳  
彥良畫并詩有岸靜樹陰合溪晴雲氣流  
之句想在鷗波亭作也彥良嘉禾人

何山弁山秀可掬上若下若蒼苔綠翰林學士偶  
歸來亭倚鷗波送飛鵠鵠飛盡沒滄茫境衣上青  
天倒搖影鹿頭舫子湖州歌想帶南風覺淒冷冰  
盤瓜李進仲姬

管夫  
人字

生綃畫就復題詩鄭虔三絕

世無有於乎何幸再見至大三年時  
壬辰冬避亂山中簡邱文中貢原父二教授  
 雲掩金戈日風生鐵馬塵亂離誰事主貧賤獨爲  
 民鷄犬人烟絕甍颺草木隣喜聞同舍語天已厭  
 荆榛

得兒掖書時戊申歲

客夢躬畊隴兒書報過家月明山怨鶴天黑道橫  
 蛇寶氣空遺水春程不見花衰容媿耆舊猶語玉  
 人車

秀野草堂注云此詩記戊申歲正明太祖改元之年也

將投海上自鴻山往太伯瀆別王左丞以父  
 老言言馬蹟漁商小船非攻守具得釋五百  
 五十人回舟寄左丞

韋褐清遊馬蹟西忍聞篁裡鷓鴣啼雲昏赤地沉  
 天狗落日孤舟背水犀小戶漁商聊復業深憂父  
 老不遑栖釁連楚越非吳計湏是宗周與會齊  
 送安上人歸馬蹟山

插竹山中偶出游折蘆濠上即歸休踞床獅子戲  
 方吼踣鐵龍駒跡尚留花雨六時紛似雪松風五

月冷於秋客來認得南泉斧七十二峰應點頭

宿殷南山煉師道院留別

道士偶見古竹灣留我養高松桂關龍蟠大澤雲  
水晦馬踏巨石土花斑綠章夜奏百靈集素髮春  
看一鶴閒忍上歸舟却回首裊裊清磬烟巒間

夜讌葉氏莊曉登悠然樓作

百尺飛樓俯碧湍六峰秀色繞闌干杏花落盡東  
風惡燕子歸來社雨寒夢裡香烟生素幌酒醒紅  
蠟膩銅盤一春樂意朝來好千里家書席上看

登越城故基

吳王臺對越王城歲歲春風燕麥生一片范家湖  
上月照人心事獨分明

題李唐江山烟雨圖

烟雨樓臺掩靄間畫圖渾是浙江山中原板蕩誰  
回首只有春隨北雁還

王鵬

鵬字九萬緱山人學行兼優元至正間徵之不赴  
以世亂避兵東山僦靈源寺屋居之教授自給葉

伯昂執弟子之禮焉所著有緱山集

雜言

清夜卧中闌夢徃天之涯名園羅珍木花徑何委  
蛇青童道我游扳條弄芳菲贈我以雙桃熒熒燦  
霞姿受之不及飡將以遺所思覺後乃起行明月  
侵山扉惆悵一至曉永懷晤難期

緱山宅漫興

西池之西竹結亭芙蓉闌檻紅熒熒醉後撫案發  
清嘯旁人不識呼酒星危坐吹笙對華月風吹鶴

翎下仙闕壺中天地只吾廬玉盤滌出瑤臺雪

聞葉竹居被寇虜

汝身行不測汝室死分明貞德千金重浮生一羽  
輕湖光兼蜃氣山色帶猿殺何日重相見清尊拭  
淚傾

過西洞庭

元洲不復見縹緲即芙蓉玉洞連三島金庭第一  
峰芝香雲氣暖竹色露華濃我亦尋真者行探虎  
豹踪

清明日同顧道士過賀氏墓

洞庭三月水如藍  
岼上垂楊繫馬銜  
綵繪高低花  
段段笙歌嘈雜鳥  
喃喃雲間畫閣垂  
珠箔天際牙  
檣掛繡帆白紙剪  
錢懸墓柏青蛾開  
篋試春衫詩  
因苦思身多病語  
不趨時口自緘知  
有靈丹慙服  
食蓬萊一任隔仙  
凡

九日

老逢佳節倍咨嗟  
落日風吹鴈影斜  
祇恐明年頭  
更白籬邊隨意插  
黃花

墨竹

飛墨如雲古意長  
琅玕雙影立蒼蒼  
多情數葉江  
南雨又入秋堂作  
晚涼



七十二峰足徵集卷七十八

武峰吳定璋友篁菟錄

橘社金 浩紫瑞編訂

莫是龍

是龍又名雲卿字廷韓雲間人方伯莫中江之子  
嘗挾名姝張鳳筠泛舟五湖傲居東山風月橋徧  
遊名勝山中文士詩人爭延致之遞請楮墨殆無  
虛日得鳳筠侍硯便欣然命筆悉滿其願而去不  
為疲也

懷王君載

年少誰爲歡君載固玉立笑語生迴瀾文采蔚可  
挹觴行及無餘逸姿乃橫集神情肆晨昏微余邈  
莫及憶昔帝里遊蘭膏費歌什風流忽星散相望  
但於邑

別洞庭諸社友

揚帆首西路言從五湖發風卷吳宮花烟淡長洲  
月神來理亦會懽至悲亦竭惜別寧爾爲所知在  
束髮

雲湖歌贈陸山人

高人卜築最幽勝雲影湖光兩相映流水悠悠晚  
更清浮雲冉冉秋逾淨君不見具區之水瀦玄霧  
出入天漢苞滄溟縈徑瀾漫數千里湛然一鏡涵  
虛清陰晴變幻倏忽異氤氲宇宙摩元氣鯨鯢振  
鬣波濤驚蛟龍吞珠日月蔽寰中大觀若箇竒五  
湖遙見白雲低幾片青帆掛南浦一行歸雁落沙  
堤平原隱淪稱不遇却憐終日湖邊住賦就堪攜  
楚女歸興來欲汎吳娃去又不見徐郎高揖安期

生斟酌仙醪百日醒勝迹祇今傳故老宿艸斜陽  
何處行

雲松歌贈許山人

縹緲孤雲何處歸翠濤蒼雪望中微  
竭來林麓散晴靄參差洞戶生  
寒霏喬柯盤屈虬龍舉白晝冥  
冥自風雨浮雲無心閒可憐松子  
多情亦楚楚山中之人樂未央  
松爲我巢雲我裳君不見長安道  
上風塵苦何似山中日月長

攜張鳳筠遊山

春山美如畫况與佳人看眉蹙峰前黛歌流澗底  
寒芳情迷碧艸香澤散幽蘭自愜登臨意難忘夜  
色闌

紫騮馬吳侍宇席上分賦

一片桃花色飛來紫陌多追風橫絕漠飲月到交  
河公子千金換將軍百戰過平生思汗血未飽玉  
山禾

西竹草堂夜集得闌字

客至逢花信風光出夜闌野香宜宿酒池雨坐春



寒竹密禽言細亭空鶴夢安青山元有約莫負此時看

山寺再訪吳文學山居

誰卜山南勝翳然林木幽清泉翠微落孤嶼片雲  
流心賞陰晴適身閒信宿留不辭常取醉幾向習  
池游

訪宋初陽陳伯求璩仲玉於寺居

開徑鄰蕭寺烟蘿趣轉深客邀人外賞僧話佛前  
心竹塢三春雪松堂萬壑陰隔林孤梵起特地引

高吟

坐久月痕殘當歌興未闌夜深花露重窓潤竹風  
寒命酒愁堪失看詩秀可餐淹留更何事名理在  
談端

岱心吳氏山堂

良夜一何寂堂虛燭影深疎鐘雲外寺清籟水邊  
林世事啣杯見秋懷抱膝吟樵蘇元不爨日可費  
招尋

分咏簾得安字朱象和席上

何處玉鈎攢玲瓏十二闌珠圓全鑑月箔冷乍凝  
寒乳燕穿猶織閒花撲未安春閨多少意隔面若  
爲看

陸山人自洞庭來尋雲間社

看君飛動意片席滿江湖白社携詩艸青山問酒  
壚閒情雲共嬾狂眼月堪呼道上聊相盼投來已  
辨珠

雨中黃葉樹吳氏一勺軒全陳仲醇分賦  
一片可憐秋霜林雨外愁濯枝分嶺樹響葉亂溪

流點綴偏宜寺蕭疎盡入樓淡晴看暝色半與夕  
陽收

花影

寂寂春陰拂苑墻枝頭葉底共低昂虛無忽聚空  
中色零亂難分暗裡妝閒弄月雲俱是幻靜侵簾  
幌不聞香山僮錯認苔斑掃只在回闌曲檻傍  
春日從先輩讌集虎邱

揭來何處浣春愁窈窕青山綠水洲片石千秋生  
氣色群公盡日取盤游花間遲酒香爭入谷口調

歌響易流不是清時容綺季肯遺鐘鼎重林邱

嚴陵釣臺

李于鱗命題即席賦

灘散七里咽江濱弔古臺荒路不分物色頻年虛  
帝席客星終夜動天文漢家龍袞方求理齊國羊  
裘肯事君千載遺霸那可見莫雲猶似束玄纁

送馮子潛遊洞庭

天開洞壑兩峰蟠地俯蛟宮六月寒君到正逢秋  
色早平湖落木鏡中看

吳江夜渡

輕帆如駛夜乘風天淨波明匹練中忽望清光一  
輪滿江寒猶自戲魚龍

張虎

虎字力臣號竹軒丹陽人寓居檀溪灣者數年

題夫椒山

夫椒高高半空倚翠滴烟巒淨如洗嵯峨一朶金  
芙蓉勢壓太湖三百里千巘萬壑鳴飛泉二十三  
灣遶流水南邀洞庭為友朋北揖龍峰作兄弟衆  
山森列各圍拱或為孫兮或為子兀然撐拄東南

天天高秀色還相連枝峰蔓嶺斷復續中有八堡  
居民烟渡頭一灣是古竹竹裡人家露茅屋屋邊  
花木四時春犬吠鷄鳴在空谷山勢東來是鈕埭  
蒼猿白鹿相遊嬉采樵有客唱歌去歌聲直過行  
雲飛清流一派檀溪曲此地由來遠塵俗清風萬  
古知者誰釣月高人一竿竹溪頭誰結棲雲庵鐘  
聲遠度山之南沈昌灣中是何所大小二瀼如花  
團蓬坑有塢深且幽烟蘿寂寂寒颼颼蒼苔滿地  
客稀到鳥啼花落山靈愁南山之南有大墅華屋

書聲雜鳴杵馬潭積水含空青香嶺春雲逐龍去  
清虛又有小墅灣別有天地非人間東風吹花雨  
初霽白雲畊罷烏龍閒山南青青出秀色石塘寂  
寂無波瀾香潭雲錦小桃塢柳搖明月金沙灘牛  
潢嘴外是東坵清白人家慎相守里仁爲美君子  
鄉奸暴傷殘復何有東泉塢接西泉灣薛張門第  
相對間原泉混混流不息夜以繼日聲潺潺水聲  
潺潺出湖口一帶岡巒接西坵朱薨碧瓦知幾家  
喬木參天歷年久杖藜我始來點下花木藏春秀

而野花梢挑出沽酒旗日有遊人駐車馬窠窠古  
人東村住別業荒涼半烟樹田中牧豎歸夕陽隴  
上畊農趁時雨新城風物美且都山青水綠如畫  
圖層巒疊岫通窅窅殘雲斷雨相模糊長虹匝夜  
冲碧霄恐有寶劍埋山腰水平古祀真仙所滿院  
香風開碧桃逶迤一徑通寨前祥符禪寺居其間  
蓮池泉脉接龍井萬松飛瀑秋雲閒石梁丈許名  
大瀆燕尾分來流水綠一林紅雨落春花千頃黃  
雲熟秋穀晝山之西復有山寒山隔斷張青灣迎

春橋頭春似海黃童白叟俱歡顏凭高試問金鷄  
墩烟霞縹緲橫西村鐵崖院中勝蓬島仙風藹藹  
今猶存鴈門山高出林麓河水分流隔南北岸邊  
商賈連舳艫巷有書教居比屋春流一碧是牛塘  
波瀾倒浸青天光萇橋雲氣濕如雨知有蛟龍深  
處藏踏青一路來山西石屏萬丈連雲梯軟藤東  
畔醉傾耳藤花風暖幽禽啼松崖竹塢兩相抱峰  
湧巖垂青不了天然一塢名桃花花香隴上春長  
好內閭風景渾非昔避暑宮中半荆棘懶橋寂寞

無人過伴奴灣頭風雨寂山窮水盡有幽處不仙  
不凡可人意秦姚二巷居相聯畫棟珠簾映空翠  
慙余放達心悠悠天風吹上胥山遊吟邊不盡好  
風月平生志願何時酬山中風景消塵慮買斷青  
山此中住題詩寄與山之靈何必蓬萊學仙去

遊官長山

大古之先杳無聞太素之後形始分不知何人壘  
此石壁立萬丈凌青雲初疑女媧補天手剩下此  
物蟠山根又疑盤古分混沌鑿斷鼇足今猶存蒼

蒼半空倚突兀高無顛危梯萬疊梯萬疊倚絕壁  
仰望一柱如登天我來直欲探幽勝欲上欲上愁  
攀緣天風飄飄吹我裳使我毛骨皆輕便手攀足  
躡不知苦但覺身世空中懸須臾翼翼造絕頂下  
視平地真天淵老龍有洞未及到絕水路斷應難  
前興來拭目白雲外太湖烟水茫茫然少焉展席  
綠蘿底一觴一咏狂且顛酒酣呼鶴竟歸去但見  
明月青天邊

路振飛

振飛字見白號皓月北直曲周人天啟乙丑進士授涇陽縣知縣屢率民兵擊却流寇撫按卜建魏忠賢生祠於涇陽振飛堅持不可未幾闖敗崇禎四年擢四川道監察御史鐫燭奸指佞不黨不阿八字於笏首劾輔臣周延儒溫體仁被旨切責孔有德叛劾山東巡撫余大成孫元化且論延儒曲庇之罪六年巡按福建八年再按蘇松常熟奸民張漢儒訐奏錢謙益瞿式耜當國者因坐振飛以失糾乃上疏白二人寃語侵體仁謫河南按察司

檢校體仁罷稍稍由上林良牧署丞晉太僕寺丞遷光祿寺少卿淮徐盜起廷推振飛才擢右僉都御史總督漕運擒土寇張方造王道善降程繼孔等賊黨破散乃下圍練之令俾鄉民自擇長副隨所長操演保護鄉井自徐泗至安東沐陽義兵二十萬壁壘相望十七年正月李自成陷太原所在震驚振飛分遣副總兵金聲桓等十七人防河要害北都既陷福潞周崇四王避賊先後至淮馬士英欲奉福王或謂振飛可扈從南京立定策勲且

釋危疆答曰我去兩淮必不守我豈敢貪功壞天下大事哉乃與按臣王燮固守史閣部可法開府揚州倚爲左右手高傑之南也士英遣使迎之振飛移士英書謂大將宜禦寇門庭不當令入內地又禁士英兵船毋得泊岸肆劫掠從賊呂弼周武愨招搖徐沛間賊將董學禮襲據宿遷振飛擊走之復其城擒弼周磔之俘愨獻諸朝又擒賊將王富捷聞士英以前嫌抑其功且誣奏縻餉而以私人田仰代之會振飛以母憂去任故鄉道梗乃奉

母樞僑居吳之洞庭山振飛嘗有德於唐王聿鍵旣建國令訪所在吳江孫可久言其流寓洞庭因手詔遣使召之至行在拜太子太保吏兵二部尚書文華殿大學士凡在閩四年在粵一年卒於順德之陳村作正命歌四章生平所著非詩草一卷疏稿二卷遺文一卷練義勇說一卷乘城要略一卷順治十二年長子澤溥扶柩來蘇洞庭士民以其向有保障山中之德留葬于法海塢又祀之於葑山伍相祠之左



昭君怨

君命重絲綸妾泪沾衣袂琵琶馬上催項刺難留  
 滯譬風吹落花任墮溝與砌可憐未落時玉樹生  
 根蒂

團灣門除夕  
 竟夕不成寐自憐轉自喟仗劍以從戎六師何所  
 至黔驢欲噬豺老馬思追驥治平效渺然進退兩  
 無致天心或垂憫幸全名與義漂泊海舟中面目  
 亦增恚寸衷百慮櫻煩悶如酒醉鷄鳴又一年日

月悲空棄

鳥戀巢

人戀室鳥戀巢往來歸宿不勝勞山中有頑石海  
 中有流水不知生與死寧復問成毀天空雲淨碧  
 澄澄鳥飛風去無踪跡

正命歌四章

死了罷了却好了闖破鐵籠飛出鳥一點靈機還  
 太虛三個尸魔永斷掃憑他世情恁嶮巖憑他世  
 變恁顛倒清風明月江水流翠竹黃花雲岫窈冥

莫愁僕莫禱古人今日存多少癡愚着境妄沉迷  
六道三塗自纏繞活潑充周端的好  
死了罷了怎麼了义手臨岐心自悄上天生我意  
如何掘閱蜉蝣朝暮老天傾地坼付誰修流泪風  
顏付誰矯况當戎馬縱橫時士女仳離朝廷小集  
忠義急恢勦邨容收拾回頭早總然疾首厭塵塵  
也愧此生太草草尺寸光陰無價寶  
死了罷了順受了天壽生前註定稿萬物榮枯各  
有時四序推遷相代紹周公空拜金滕册徐市誑

遊蓬萊島生老病死緊相隨蓋世聰明難弄巧也  
不愛也不惱黃梁夢醒東風曉來時便來歸便歸  
合分分合仍浩浩雁影潭光不繫擾  
死了罷了休差了綱常名義還須討天地之責屬  
何人豈容恡惜豈容藐懦夫怖死生可憐烈士輕  
生死堪懊死事容易成事難生前短促死後遶生  
嶽立死日皦顯得英雄真頭腦不然野外骨無邊  
誰辨豪華與餓殍柳堤拂盡烟光裊

鷺江舟次懷友

客心如野鶴孤立亦何須海月相摩盪山雲間有  
無幾年思藂桂何處恰依蒲轉憶床連夜燈殘夢  
遶吳

重陽後一日和前韻

昨日登高望楚南半天風雨隱晴嵐酒逢知己愛  
移座憂到關心不忍譚客散彩禽鳴自在蝶栖黃  
菊夢清酣光陰易逝行難滯等待明朝日又三  
吳拙孩招登五老峰不赴以詩來和之  
等閒不敢望高秋總對黃花不解憂此地雖能歌

戰勝故鄉猶自嘆民流晚風吹斷林塘冷鳴鴉啼  
殘山寺幽五老峰頭饒異境中原何處寄雙眸

太湖偶作

中藏萬頃愁欲訴湖心月事事痛關心先從何處  
說

玉華洞二十絕

存二

天書無字句譜刻寸靈間若向石求解寶函分外

頑

天書寶函

何緣夢出世入世苦盤桓恬適對煩惱上針幾度

彈

天平針

對花

須知元妙屬天工  
卉木噓春自不同  
試看海棠殊絕處  
精神全在半開中

路澤濃

澤濃字安卿  
皓月次子  
官兵部職方員外郎

立冬日洞庭山社集看菊

三吳秋盡不知寒  
黃菊經霜尚未殘  
鄉里衣裳少  
新製艸堂詩酒任交歡  
十年旅夢悲王粲  
隔代風

流憶謝安且向花前拚一醉  
洞天福地此中寬

侯性

性字若孩  
商邱人  
狀貌魁梧  
腦後有奇骨  
善騎射  
能文章  
補博士弟子員  
時方多故去而從軍於閩  
於粵累功有封爵  
旋棄官歸而養母  
隱洞庭東山  
母終遂葬焉

無家詩

斯人斯世已同無  
僅只留鬚不類吾  
蕉鹿夢中爭得失  
神仙橋裡看樗蒲  
山山水水筇三尺  
雨雨風

風酒一壺誰不有家爲智累古今真隱盡如愚  
 侯世藏已回無對只留書不敵吾詩思  
 藏字月鷺從路漕撫移家東山與吳中之逋臣遺  
 老共相引重明詩綜載之

夢歸有佳句  
 里巷蕭條白日斜廿年魂夢一還家  
 夷門人去屠沽老梁苑臺荒父老嗟  
 旅燕幾歸寒食雨清尊空對雒陽花  
 城邊不見開元寺遍插旌旗急暮笳

馬同春

同春不知何許人明末僑居馬蹟之寨前  
 灣有八景詩馬蹟山志載之

吳宮址

闔閭嘗避暑築室此山中歲久遺荒址  
 艸樹搖西風緬昔殫民力誰云霸業空  
 世事易今古飄忽如轉蓬嗟彼創業主  
 猶建九成宮

古竹津

昔時古竹津今見殊殊  
 風帆過東湖舟泊苦竹渡岡頭苦筍生  
 沙洲起孤鷺細雨濕前途依稀日將暮  
 沽酒向花村酒家何

處住屐頭泥滑滑行人宜穩步

風州桃花塢

昔覩桃源圖今見桃花塢徒聞今日名不見昔時

樹繁華易消沈蘭麝終塵土誰能繼芳踪栽花遍

林圃欲問桃源津媿我非漁父

唐大卿

大卿明末人與祥符僧善遂卜居寨前灣

萬松居

古寺陰陰殿閣重四圍屏嶂萬株松老僧結屋林

深處閒聽濤殺曳短筇

望湖亭

孤亭高出鷺峰頭萬頃湖光一望收試凭欄杆舒

遠目洞庭南去接湖州

金印

印字信孚浙之孫溪人授徒武峰因移宅焉

閱稼

耕食古所戒游民恒苦飢數畝在村北歲事長憑

依五月鶉鳩鳴好雨彌天飛及時畊以種旋使瘠

者肥望望欣極目青碧烟斯微蚤熟計秋半我誠  
東山歸

種松歌為吳心湖作

長松矯矯青蟠空雲厓移植嗟神工廣庭忽生泰  
岱色寒濤六月飛天風主人意氣本孤特絕世岐  
嶷埒金石擁書時一攬幽光十丈文虹樹頭赤

華山道中

白石青厓取次登雅游裝束便于僧花風扇煖春  
郊路減到春衫止一層

金印

印字岐雲邑之下堡人父雲川以岐黃之學來東  
山遂居之所著有漱雪草

山樓書懷

登樓即見山山光日如故不須遠躋攀千峰在窻  
戶樹老青插天雲歸白成路默默兩無言相看遣  
朝暮

和鄒舜五太湖采蕪歌

片葉隨波不厭深銀絲漱漱生湖陰應知所產本

來久誤與苻藻相浮沉先生靈慧具卓識獨向烟  
波能物色試摘冰肪手自烹香潔何如五鼎食湖  
上居民數百廛水中成市人摩肩得錢舉火世相  
襲只今猶頌我公賢

鷄山看桃花

棹轉谿邊路橋通水上村別開花世界渾入錦乾  
坤綠襯漁家網紅搖酒客樽秦灰飛不到鷄犬幸  
相存

小桃源訪韋在野

遠尋溪上屋一水帶迴廊畏暑出山早爲君忘路  
長染衣松翠濕入戶墨花香試聽碁聲落丁丁在  
竹房

穀雨日止公房看朝鮮牡丹

異域何年種精藍此日開遠公停錫處天女散花  
來艷色矜殊俗孤芳托誨臺下方池館富不染一  
纖埃

雨宿包山寺

四迴山抱寺松竹過橋分林氣鬱成霧磬聲寒出



雲客稀仍少事僧儉亦無文未遍宜遊地終宵雨  
厭聞

龍渚

石不探龍渚觀無天下奇忽驚百獸舞復訝五雲  
垂洵是天開闢寧非神護持拜呼元有自誰笑米  
生癡

壽寧庵秋晚即事

釐峰餘氣結青螺遺事當年竟若何季子祠荒歸  
鶴少濮公墩冷牧羊多一行老樹罨溪水幾點寒

花媚竹坡獨倚香臺觀法施烏啣殘粒散巖阿

蘭庵詩為白門周儀一賦

以蘭名庵豈退藏誓將精進暫韜光一絲未試經  
綸手五采先成錦繡腸養靜不難窺奧室治功直  
欲比扶桑芸窓藜火書千卷消盡車塵馬足忙

絕糧

西舍東鄰粟萬箱空厨日昃甌猶荒無聊試檢留  
侯傳不載當年辟穀方

題海眼

天然雙眼碧峰頭炯炯波含百丈湫神禹藏書無  
定所何人能下鐵甬求

徐 案

案字天俞長洲人僑居東山文采風流迥出儕輩  
山中如吳源長葉梅友慎念茲朱羽文皆與締交  
結社稱畏友焉

感懷

日月去何速爲問天蒼蒼美人何處所十載阻冰  
霜顏色或未改思心亦以長歡愛來夢中覺餘敢

相忘佩玉和鸞散恍惚雲錦囊何獨別無言使我  
增憂傷

巢居非今人穴處還自昔悠悠念厥初彷彿去咫  
尺老死只無爲天下亦何易如何禮樂成翻開闢  
爭域

蟻娘不知臭抱丸富家室蜉蝣重性命百年盡一  
日物性固如此何勞至人格立言不近情虛名更  
何益隴畊與白春勤劬自力食

秋虫鳴露砌時節暮將至萬木未肯凋悲風一何

厲人無天地長一身本如寄自不修微名焉知此生貴

佳人艷南國不爲好修飾體服豈異常藏身畏人識芬芳蕙蘭花由來可比德所願長青春東風借微力

一身古人骨天地用陶冶居上自不能况乎居其下問君亦何爲傲然足艸野

挑燈對深夜獨坐光燄中鬼神察其心四壁寒生風方開古人傳洙泗忻相從懷哉吾何往雄劍號

空蒙

我懷獨行士處卑乃更尊侯生不得仕東海垂釣綸鼎鍾詎足尚藜藿甘饗殮完身一布衣不辱縷縷存世人任相誚頽然立乾坤

官米謠

上官善政如春風下民戴之萬邑同蝗不入境亦自有縱犯無傷藉農口租收無入空回船十畝萬畝輸稅先古言在野猶在國可憐飢民行不前外江死者無完膚道路爭割如烹鮮纍纍腥骨蝕霜

雪怨鬼般咽迷蒼天且如群盜半天下天子避殿  
求英賢整師十萬屢報捷賊勢雖傾未全滅遂令  
天下盡飢寒會有豐年亦泪血吾吳天幸小有年  
侈奢已極誰之愆百物價騰越數倍斗米五百青  
銅錢廉士甘餓閉戶死丐者兒女相摩肩汹汹衆  
殺欲倡亂富家豈得能安眠貴糶賤糶濟鄰里小  
鄉爭米人如市橐囊盡罄苦無遺鬻子莫售空相  
妾安得城西麥熟時飢民有天天無私

觀慎念茲所儲古泉歌

君家有錢文式古匪如埒地成阿堵貫縑雜亂一  
篋中四千餘襍眉稜吐固知神物利于民鑠甲鎔  
鈎想英武面漫相異伏盛衰赤斑光怪越塵土皦  
天烈日鬼爲役無位而尊功亦溥顧予羞澁囊轉  
空杖頭蕭索山奚主寧忍塗膏去復來網羅不設  
從飛舞

春居

啖栢食松嘯隔林掀髯都作鳳皇吟山中甲子花  
開落世外風波夢淺深野老向來能自適故人久

不見相尋携筇望斷升沉際蒼靄青嵐好酌斟  
草連天未闢芳菲新霽山家盡澣衣燕語花間春  
未足犬嗅籬畔客來稀軟沙細路輕游屐半閣虛  
簾淡落暉幾日吟餘難把釣水花飛濺上漁磯

寄憶梅友

鶴立僂僂瘦骨樁温顏如玉老相宜客游廿載登  
樓賦名在千秋弔古詩修品清貞敦舊族居貧甘  
旨羨佳兒睽離無奈春逾半宛對琴尊入夢思

雪夜禪

空山坐深夜照心非月色以此反自然吾何有知  
識

送吳源長先生之江浦

別去相思風雨秋旋歸又復買離舟波平點點飛  
鷗路艸逕斜陽獨倚樓  
江浦雲深路渺茫故山回首萬林霜誰言在別無  
滋味敗葉叢中話更長

龔源

源字鳴儀邑之水東人授經東山以館爲家父子

相繼者二十餘年與人論詩必宗李義山云

珊瑚枝

銅盤仙人泣秋露短劍欲掛要離墓杜鵑淚染桃花雲飛落珊瑚海中樹十年飄泊垂楊渡夢中遠踏扶桑路齊州九點琅玕青一把愁紅濕烟霧

采菱曲

江南日暮綠雲凝遊女蕩舟歌采菱髻學秋烟嬌不理波紋綠綺光稜稜蓮葉東邊盡橈澁渚平浪淺蜻蜓立絲牽並蒂歌聲低葉摘蓮枝淚痕濕蘋

岸風微珠翠香影落澄江空斷腸照見金釵雙花雀可憐錦帶兩鴛鴦宛轉中流弄楫遲柳塘野鳥傍人飛落花狼藉無消息直唱菱歌更不歸

龔端

端字非兀明儀子少以疾跛一足杖而行因自號拐公葉蒼舒作拐公說贈之

試茗

艸木靈時氣雨前焙製新嫩香深得火妙綠淡方春顧我情偏嗜鈔經每贈人水交清有味心口黯

相珍

躬庖

不欲淘虛器盤食事必親吾甘循瑣屑物始脩精  
神首藉名非浪糞鹽道益尊兒童休笑語竈下有  
畸人

贈藤杖

受我終身托維持力自優也深甘寂寄匪甚樂荒  
遊百節標微行頎形碍妄投泥塗同把滑辛苦自  
東疇

張玉

玉號忍齋南都士大夫也鼎革後隱居馬蹟之張  
青灣

題耿灣

別引荆溪作畫圖具區西望竹山孤喬松秋倚薰  
葭出長鬣宵隨釣艇呼一徑落霞聞短笛半林殘  
日晒漁罟志和自是烟波客肯學當年伍大夫

吳鵬

鵬號闇齋居馬蹟之西村灣朝夕遊神仙庵多題

七十二峯

寓公

卷七十八

咏然終不著其邑里

吳丹井朝烟

東風芳草綠煙浮深鎖香泉一鑑收鶴駕至今何處去白雲惆悵思悠悠

松岡白鶴

平岡遠勢接西山蓋地松陰鶴夢閒蕭瑟西風寒月白一棹驚破碧天關

七十二峰足徵集卷七十九

武峰吳定璋友篁蒐錄

寄山章佑昌鼎儀編訂

徐乾學

乾學字原一號健菴崑山人康熙庚戌進士殿試第三人由翰林院歷官刑部尚書於書無所

不讀學有根柢

聖祖仁皇帝恩遇日隆忌之者滋衆或以飛語中傷遂三疏乞歸奉



旨俞允仍命管理修書總裁事務以一統志明  
史書局自隨

御書光燄萬丈四字以寵其行既歸里即移家太湖之東山屏迹編摩克盡心力越三年而兩書告成其居山也以及引後學振恤孤寒為事去之日至有泣下者

山居作

湖山佳處靜安居且喜門無執客車伍相祠邊吹角曉莫鰲峰際墜梧初舞樓寂莫吳趨曲戰壘銷

沈越絕書玉柱金庭何處是閒時行樂伴樵漁  
窈窕仙梯澗路通西山儼對玉芙蓉名園灑灑通  
湖水蕭寺陰陰夾道松終古碧波吞日月三秋銀  
練舞魚龍他時橘熟霜楓晚一片紅林曳短筇  
青尊白紵未消愁漫說徐公百不憂抱樹蟬號層  
嶺月颭風菰熟五湖秋千年書秘龍威洞一葉人  
傳范蠡舟便擬問津銀漢曲碧城好與列仙遊  
喜金介山至

昨歲銜恩笠澤還一時嵇呂那能攀忽傳佳唱蘋

洲向遂枉高軒橘社間小海棹歌看劈浪雙絢蠟  
展愛遊山酒酣談笑寧知倦花落清齋盡日間

癸酉八月許鶴沙王却非招往秦望山莊為  
耆年會賦謝

白舫青簾數往回漫云海國近蓬萊焚香永日惟  
歌枕聽雨涼宵獨舉杯窮巷久無人跡到仙家新  
有鶴書來竚看蟾兔當三五洞府華觴許暫陪

甲戌三月三日招同錢湘靈盛誠齋尤悔菴  
黃忍菴王却非何涵齋孫赤崖許鶴沙周礪

巖秦對巖諸公舍弟果亭禊飲遂園作者年  
之會用蘭亭二字為韻

勝集群公共采蘭杏花烟雨繫青翰歸田髮漸驚  
全白望關心還抱寸丹佳節嘯吟行屐健晚春禊  
袂袷衣寒酒酣莫漫言辭去指數東吳此會難  
梁鴻溪並陸機亭颿驛中間桂槩停谷水縈回環  
睥睨玉山蒼翠滿堦庭羽觴角觶休辭醉急管繁  
絃莫厭聽請看泰符懸象緯熒熒南極老人星

葉燮

燮字星期號已畦代居吳江之分湖貫淞之嘉興籍康熙丙午舉於鄉庚戌成進士乙卯謁選得揚州寶應縣縣當南北要衝時八閩未靖軍行紛沓難於補苴目擊時艱作詩紀事不免悲憤又以直道而行不能曲意承順大吏不二歲落職聞信欣然曰吾與庶吏同列白簡榮於遷除矣時嘉定令陸稼書先生同被叅劾故云既罷久之卜居吳縣之橫山下顏其堂曰二弃亭曰獨立蒼茫處上下古今以詩文自豪從游之士日衆學者稱為橫山

先生東洞庭葉士鑑其族也學詩於先生因延先生修南陽世譜主於士鑑者且三年門下名流曉相過從唱和為樂流風餘韻故老猶能道之

擬杜出塞

出門復入門去路想還路揮淚辭雙親雙親年已暮不知歸來時可仍倚閭頷行行雁門關去去黃河渡目飽風中沙足礪磧底步雲黃天茫茫猶如望洋赴此身亦何有萬死不知怖昨夜賀蘭山報賊騎無數居延急添兵受降早益戍奮滅此朝食

早使旂常樹

咏史

孫郎起江東十七定霸圖李氏肇太原十八群雄  
誅天奪伯符年賊滿逃伏辜歷數歸秦王建克相  
繼屠兩君蓋世傑非有甲乙殊唐允集大統孫厄  
僅偏吳論世迹成敗無乃愚鄙夫蒼蒼不可卜顛  
倒美狗芻惜哉周公瑾沒世不稱孤

廢書而歎行

秦坑一炬青竹絕萬古歌哭兩俱滅書生孤憤更

何從弔古無憑休擊節誰奏鯁生馬上篇重令腐  
史謗書揭天荒地老從此長墨漬行間噴碧血龍  
魚鼠虎幾春秋梧山湘水同崩竭艷骨明年草又  
青茂陵無樹秋風烈玉簫金管兩頭空漢水無情  
西北咽宵來展卷坐愁城紙窓颯颯暗短檠千秋  
亦何與事事拔劍欲喝月倒行安得祖龍今復生  
盡束黃卷再擲咸陽坑

小春十一日泛東山同諸子步月度嶺至高  
峰卧佛寺三鼓而歸

千載黃樓後于今復幾宵月沈峰箇箇樹斷澗迢迢谷響傳僧寂雲深護犬驕老夫隨數子賈勇上層霄

地轉天迴處乾坤放眼齊佛僧高並卧霜月冷空齋茗果山廚供壺漿行棹携林間敷坐好忽已唱寒雞

僧話前朝事浮雲瞬息過興衰松記憶心迹鶴如何伎倆嗤山鬼陰森度女蘿仰看星過露倘許訪明河

興盡迴筇路空山轉有情下方仍入世明日惜分  
行寒月銜峰去霜楓隔水迎此遊真不媿恍惚似  
三生

仲春偕諸子過東山宿擷芳草堂作

湖影連山動魚梁積霧開三年為別久六幅故人  
來岸雪猶遲柳鑪香欲奪梅黃公壚在眼江上笛  
堪哀

望洞庭兩峰

翠微天畔插晴空兩兩遙嵐鎖紫宮那得主人堪

對買好令賦手並爭雄  
霏霏雲起天教合寂寂螺  
分月在中便欲與君乘浪去  
幾回收拾舊詩筒

過翠峰寺訪輪公不遇

徑折峰迴只此間  
白雲黃葉界重閑  
老將短策依良友  
寒伴孤篷歷故山  
落木風高驚薜荔  
在山泉出任潺湲  
何當一步中庭月  
未許幽人照破顏

與譚景鄴周雷門潘含章夜話有感

岐路何妨任草鞋  
伯倫荷鍤未忘埋  
交因契濶貧逾熱  
境到荒涼雨亦佳  
羞向江潭誇屈宋  
偶經池

館憶茅柴諸君今作金門伴  
一尺梧桐百尺階

與輪公夜話

陳迹追談三十年  
琉璃殿北悵離筵  
自從馬首東西判  
歷數銷魂賦黯然  
行藏各別自雲泥  
君傍螭頭我把犁  
熱開門庭涼似水  
掛瓢三十六宮西

衲袍曾賜乘雲錦

曾賜乘御馬

斑管揮時帶紫泥  
多少雄

心銷一鉢酣眠只是不聞鷄

和濟蒼上人原韻

立處何須問別峰別峰只在此峰中自從吸盡西  
江後那得湖流一滴東  
春門挈伴踏高峰一瞬流光冬又中從此直交成  
住外笑伊化鶴說遼東

周金然

金然字廣涵號礪巖松江人康熙進士由翰  
林歷官官詹洗馬淡於仕進乞假歸里愛洞庭山  
水之勝賃居某氏之據梧閣構斷山亭於石公山  
絕壁與山中詩人周公贄秦嘉銓觴咏其間自稱

石公山史

訪覲侯澄鮮閣惠詩次答二首

高閣晝方靜幽人喜客臨相携一送目堅坐共論  
心古訟金庭簡小山桂樹林如知真福地悔不早  
抽簪

新小山椒築端居祇塊然從茲望衡宇何異接村  
咽來往無人覺風流二老偏披襟兼得句真足遣  
餘年

夏五望後二日喜覲侯北山小集覲侯即席

有作次韻

氣吐三江吞五湖南皮不數建安徒徐傾竹葉供  
吟嘯細颺茶烟入画圖逸興翩翩日下鶴忘機汎  
汎水中鳧縱論今昔行藏事高卧堯峰得似無

以汪純翁  
相擬故云

天上歸來此結廬得朋有慶更何如漫稱太史誇  
簪筆只戀名山懶著書却往清談周黨碩多慙問  
字子雲居八叉手便詩成去山路迢遙月出初

山齋詩懷叠前韻示觀侯

不向君王乞鑑湖縱情邱壑任吾徒數椽五柳先  
生宅一幅孤山處士圖適性大鵬同斥鷃具官秉  
雁等雙鳧沉冥頗有蕭然志内足於懷一事無

已歷三時下直廬

余乞歸已  
九閱月矣

不巾不襪野人如寧辭

宰相山中秩願發靈威洞裡書弗戀堂餐甘藿食  
未登仙籍好樓居消除熱惱安心竟長日悠悠太

古初

張北山挾仙樓避暑周少侯有詩次韻

流金灼暑太無情薄暮微涼水面生趙盾日看啣



嶺沒楚王風待上樓迎蟻浮巨竿傳清醪蟬度高  
枝曳曼聲我輩不閑憂樂事憫農未免話陰晴

和覲侯桂枝辭

結隱同居笠澤濱家風交味並稱醇開尊作主誰  
為主叢桂留人即故人

天台嶺外天香國金粟花前金粟屈卮不是衰翁拚  
醉倒料儂肯負此良時

十二闌干宿雨收霓裳一曲海天秋招搖山上群  
仙會萬斛香蒸碧玉樓

廿咏都成絕妙詞粲花筆舌錦心思洞天新譜人  
間少須倩霜娥唱桂枝

張恒

恒字北山與周礪巖太史同里志趣相合礪巖既  
貴北山即隱居石公山中後礪巖移家洞庭北山  
實招之

過礪巖太史隱居次覲侯韻

故舊為偕隱湖山喜共臨幾年空寂寞此日有同  
心綠野初開徑青鞋任入林縱談遺世慮所得是

投簪

再里遺風在公來豈偶然豹藏山歛霧龍蟄海無  
烟捲幔湖光合彈棋花影偏况逢良友至酬唱可  
忘年

喜礪巖先生移家石公山次覲戾韻

賀監當年乞鏡明先生高尚是其徒枕流漱石添  
詩料載鶴囊琴入画圖波浪深深浮一葉雲烟靄  
靄下雙鳧石公從此名尤著曾見風光霽月無  
翠壑丹崖任結廬蕨肥蓴美樂何如携將太乙藜

邊火來較靈威洞裏書漁隱全家儲釣具神仙風

世好樓居

先生在京邸寫漁隱圖以見志今石公小築環樓皆山真洞府也

可知不負東歸興

暫謝承明賦遂初

歸莊

莊字元恭號恒軒崑山人震川先生之曾孫也父  
昌世以画竹擅名吳中莊亦寫竹變乃父之娟秀  
而出以豪縱奕奕有神采能作擘窠大字世並珍  
之莊無子有族子佐臣者賣藥東山莊依焉與廣  
平之路易公安卿兄弟樵風之鄭海若薇令叔姪

水東之金亦陶胥母之翁季霖相唱和酒酣以往  
慷慨悲歌抑塞磊落不可一世人咸目之為狂晚  
年益怪誕歲朝自題門榜云佛云不可說不可說  
子曰如之何如之何堂聯云兩人合得百年內太  
聰明外太拙一身奉祀五世人何寥落鬼何多

福源寺羅漢松歌

福源建自梁大同創寺之年植此松歷千餘載寺  
再廢此樹不改青葱龍大二十圍高難度攬挈天  
際如虬龍石根缺榦苔斑駁狂風搖動枝錚鏗夜

然長明燈晨撞萬石鐘聲光震耀生靈怪柯葉常  
有白雲封水車之後大木盡斤斧欲加鬼不容天  
王柏上方松昔年來遊有題咏何況此樹六朝之  
遺踪松之名者今有報國古岱宗彼以神京名嶽  
顯此獨晦匿於震澤之中縹緲峰大材僻處自矜  
貴玩賞不辱於凡庸天挺植物有如此人生何必  
皆遭逢嗟哉人生何必皆遭逢

望夫椒山

三日揚帆泛具區水面諸峰大者魚龍小者鳧其

最著名有夫椒烟中一抹遠在湖之西北隅吾欲  
從之訪古蹟波濤際天阻險途在昔春秋有強吳  
利擅三江與五湖蕞爾於越仇大邦樵李一戰斃  
闔閭人殺爾父爾敢忘出入必向君王呼枕干三  
年雪讐耻夫椒之役稱雄圖臣其君妾其妃吳王  
此時真丈夫嗟乎吳王真丈夫春秋大復九世讎  
不訛遷紀邾鄆部彼楚項襄宋思陵千古罪人死  
庸奴曾不若秦苻登死休自誓殲羗胡日暮途遠  
鞭荆平夫椒之役何媿伍子胥吾望此山千古猶

憑弔放言不畏迂儒笑

上方寺前有古松跨澗偃覆形如卧龍

上方寺下有孤松舊錫佳名曰卧龍幽谷難施霖  
雨澤名材空具蜿蜒容婆娑綠蔭聽流水跨踞蒼  
柯見遠峰僻壤諒無巡幸事知君能免大夫封

翁季霖山園即事

暫將游屐駐山房端坐還教老眼忙園叟帶霜收  
橘袖家童臨水飼鴛鴦行庭花石皆竒玩開篋圖  
書有古香春草亭中情自適圍棋一局酒千觴

九日登莫釐峰

勝地登高仗短筇層岡邈迤度深松漸窮歷亂雲  
端石盡出青蒼湖上峰漠漠長空飛雁鷺茫茫大  
澤卧蛟龍良辰擬醉江州酒有客携尊山半逢

古柏

古字斯民號雪耘松江人性情曠放不拘繩墨以  
詩画名於吳下嘗遊東西兩洞庭愛之不忍去寄  
居蕭寺經年欲盡得兩山四時景色烟雲變態以  
為大癡粉本黃九烟稱其高趣天真迥出流輩

東洞庭

揚舲擊楫走震澤地缺三州混虛白此中有峰七  
十二洞庭稱雄聳危突出門不告友不隨好遊先  
放東山屐穿坡轉澗雲橫路斲峰能使湖光露山  
深雞犬驚客至恍入桃源別有世一聲遠磬落蒼  
烟紅葉林中翠峰寺老僧間坐寺門前對我欣談  
柳毅事楚水吳山兩洞庭柳君龍女共傳名荒祠  
黯慘藏霾氣古井寒泉汲冷聲臺名演武旌旗繞  
寶弓射落天邊鳥興亡盡付夕陽殘英雄白骨埋

衰草不若武衛高且賢拂拂清風綿後好松濤法  
海喧朝夕佛耳長聾作卧客晴日螺噴翠閣雲寒  
宵梅語茅亭月池邊怪石已化龍峰頭撒飯還成  
石須知造物皆幻軀臨風對此無虛擲嶂復疊兮  
巒復重杖雖策兮難遍窮何如搔首莫釐顛千里  
湖山一覽中

西洞庭

東峰歷過轉西峰世外閒身孰可同西山之西多  
爽氣石公之石皆珍瓏天開一線光堪挹藤蘿幻

作雲梯級山根鑿浪接飛橋汝氣蒸陰分洞入又  
聞龍渚生湖底烟筋雲骨盡沉水茲遊恰逢水落  
時怪象竒形爭獻美消夏灣中列宮殿吳王避暑  
開瓊宴霸業炎炎暑不炎涼風吹動水晶簾翠鈿  
珠串多妖艷按板齊聲唱採蓮繁華斷送留殘碣  
月白山空叫杜鵑縹緲峰高真竒絕撐天立水吞  
鰲窟東眺滄溟北暝吳西控毘陵南控越衆峰羅  
拜不敢爭我獨振依凌日月路下包山歷萬松一  
松勢欲變虬龍虬龍見之頓生妬捲雲呼雨角雌

雄毛公壇上蒼苔厚烟冷丹爐鶴去久仙境曾有  
仙人居林屋洞天稱第九韜幽舍晦無容光偃偻  
秉燭達石房神斧鑿劈開混沌隔凡難入心徬徨  
不遇仙人尋高隱四皓遺蹤猶許近祠荒樹冷風  
蕭蕭千年危坐觀樵牧牧者自牧樵者樵飄然我  
至無拘束收拾湖山在兩眸人生那得幾曠遊紀  
遊不厭詩長篇扣舷高歌酒滿甌醉枕蓑醒復歌  
洞庭雲震澤波願老烟霞作釣徒君不見青山送  
盡遊人屐今日登臨即疇昔

題嵩岩小築二首

小築謝紛紜嵩山具體分繞籬花接澗對榻嶺生  
雲酒醜頻留客名藏不用文考槃詩取重餘韻復  
推君

有人山則靈在澗結茅亭竹灑當階綠山分入硯  
青種花依菊譜品水檢茶經好鳥知風雨深巢惜  
翠翎

王邁人方伯見訪駕湖舟次和原韻

薰葭露冷蓼花新峰泖移舟泊此濱萬頃駕湖秋

水白十年魚信友情真交深不藉通名後心醉非  
關對酒頻為唱巴音酬郢雪一簑烟月許漁人

九日讌集陳達江先輩池亭

各園結夏又秋殘近水樓臺百尺看許我白衣來  
送酒羨君黑髮已彈冠珠簾細雨梧桐落花砌微  
霜蟋蟀寒醉後登山期絕頂良辰能得幾盤桓

高容

容字涵明別號五湖鷗逸嘉禾人其子仲調賣藥  
於洞庭山因家焉涵明以訓蒙終其身性喜吟咏

康熙甲戌年八十有一矣手錄其詩八百餘首釐  
為六卷自為之敘貧不能付梓迺鎔錫為筒者二  
錮詩帙於內一藏之武山寺壁中一傳之子若孫  
曰有能成吾志而梓者方得啟焉山人許濬載其  
事於集至比之所南心史云

秋日吳公張招泛太湖

雲薄漏朝陽閒泛尋秋艇烟巒七十二隱現波萬  
頃葭菼風蕭蕭沙鷗夢欲冷堤樹乍丹黃似織天  
孫錦淡濃均有致摩詰詩中景目到心悠然酒趣



入妙品

過何山訪明頭陀

秋入千山瘦携筇破曉烟少陵詩即史元亮酒為  
禪一掃波旬障同歸象罔天滄桑任遷改不問是  
何年

同金岐雲翁微同周若子孤松上人看澗水

隨聲尋草迳百折走山泉激細絲絲軟玦桃個個  
圓寒驅三伏暑清邁九秋天莫向花洲去春風載  
管絃

小隱詩為周若子賦

聲飛画角羽書傳萬里江山異昔年雖吼龍精殫  
國淚且探鳥跡淨塵緣茶烹石鼎生松浪香爇金  
爐起篆烟白雪吟成知和寡憂心堪繼采薇篇

宿白公堤

月漾秋空萬里明紛紛水陸奏新聲那知人靜山  
光冷心在水壺夢亦清

贈髮

念爾相依廿載餘絲絲櫛向竹窻虛後今短却三

千丈莫望懸梁讀異書

周南

南字見湖吳江人績學力行動止皆模範邑中推為老師明之中葉洞庭諸右族以延名師訓子弟為重山前葉氏聞見湖之名禮聘來山時年已七十矣有玉樹堂詩一卷

江館

秋風散林薄斜日亂鳴鷓孤館少來客閒階有落花村聲急秋杵江色淡晴霞已有淒寒意長歌感

歲華

湖邊拄杖有懷洞庭海慶施兄

延攬湖邊日正長北山春色未能忘重嗟不辨將

軍樹施居莫菴將軍墓側葛震甫破屋先生傳中所云有大樹壓其廬者是也亂石難分道士羊

野水自涵江月淨浦風還送渚花香殷勤斗酒憑

誰勸肯與籬東醉晚黃

周際昌

際昌字華西南長子萬歷中補博士弟子員試輒前茅食廩餼數年而棘闈屢試不售授經東山鄭

薇令圃鄭進之階俱出其門各有著述其原本蓋  
得之師資者深也所著有天香館詩集

山中

躑躅山程遠終朝事苦吟西風遊子色落日故人  
心天淨孤鴻遠秋高木葉深客愁何處遣青旆隔  
前林

夜雨

亂堆秋卷半叢殘倦睫餬糝興欲闌雨過樓頭花  
正落酒酣江上夢初寒桐當焦尾音誰辨龍到驚

人画亦難剩有匣中長劍在摩挲燭影幾回看

周宸錫

宸錫字保生際昌少子性好為古文辭不諧於俗  
年逾三十始青其衿旋遇鼎革即棄去隱於東山  
牢騷不平之意時見筆墨間館安定氏為忌者所  
擠幾致文字之禍主人因盡焚其稿故鮮有傳者  
庭梅為冰雪所壞歎次鄭薇令韻

庭梅歲著花不與衆芳伍冰雪添精神不屑邀春  
雨昨冬蓓蕾繁滿擬開無數豈意歲奇寒嚴凝塞

穹宇初驚雲在枝，又嘆冰入土。遂使未開梅零落，  
成空樹梅豈不能。撐順命固其所，今朝春風香冰  
雪。消何處梅雖不著，花生意猶萬古。幸有來年期  
幽憤，當一吐一花何足言。志士心獨苦。

沈田尹

田尹名峻，以字行。木瀆鎮人。五歲孤，母李口授經  
書，即能領解。既長，師徐乾學學文，又學易。繼起儲  
禪師，餼縣學，負盛名。與錢中諧、彭定求輩並稱。吳  
中大師所著各體文，故舊門生並記誦，取科第而

峻僅以陪貢。老時論惜之，性篤孝，痛父懋，故早世  
不獲奉養，每念及涕零如雨。事王父母暨母一一  
體順，能得歡心。宅三憂，洎葬祭動，遵古禮，念母苦  
節，籲情有司，得膺旌典。其沒也，韓宗伯莖手書褒  
揚，盡孝成人子，闡繹通經付友生之句，以輓之。所  
著有四書折衷、易經書經題旨、三徑亭集、維揚雜  
咏、名見紀事、洞庭雜俎、又東山鄭圃著讀易緒言  
峻多叅酌。

答贈揚州崔太守蓮生

金閨名籍異群空南國專城伏鉞雄五馬行春絃  
誦裡三年秉節蘖冰中厨烹揚子江頭月袖挹乎  
山頂上風聞道此邦民力盡勞心撫字髮如蓬

贈洞庭翁君漢津

曾為雲南  
西河令

雙鳥曾飛到百蠻兩年飽看碧難山錦城春暖詩  
情富鈴閣香清吏牘閒蕪石載將群玉友名花移  
得六郎顏

歸裝載大理石數  
片孩兒漢一株

集賢數有高人駕北海尊

疊日往還

七十二峰足徵集卷

七十二峰足徵集卷八十

武峰吳定璋友篁菟錄

橘社金士官木齋編訂

陸燕詰

先生字大生吳郡人博通今古才調富有熊芝岡  
督學南畿首拔於童子場中試輒前茅食餼當貢  
世畋滄桑遂隱居太湖之錦鳩峰下筆畊自給學  
者稱為鳩峰先生先王父延主家塾三年乃遷居  
席家湖上終老洞庭墓在高峰寺之左其長房子

孫復歸郡城守墓山中者第三子瑞鶴第五子瑞熊也

西湖二首

奇麗空吳越風流遇白蘇看圖思立馬得意可移都殿閣皆飛動丹青半有無眼前惟叫絕何處着形模

是誰神位置幻出化工奇點染一泓水消磨千古詩人增風月恨天縱綺羅癡小與滄桑劫長堤柳不垂

百舌

簾幙曉瞳矓鳴禽曙色中心閒如自喜舌在欲爭工百變聲全別雙栖語不同玉人春未醒為爾怨東風

太湖詩人葉羅浮吳不官各有雁字詩膾炙人口予亦戲拈三十首聯示學子俾免偏仄未敢與二公較優劣也

賓鴻嘹唳起南中書信遥遥附便風玉露濡毫溜碧落銀河蘸墨點虛空參差缺處秦碑斷結構疎

時草聖工我亦倚牕摹鳥跡不堪月色正朦朧  
短長結隊自相從腕力排空未許慵卓筆峰頭斜  
度鳥凌雲臺畔見游龍一天月色行難整半夜霜  
華墨未濃布陣已完猶不盡似於紙尾跋遺蹤  
百番玉版大如幢天際留題不一雙錦字有梭悲  
遠道硯田無稻怨他邦飛因失路書多誤弋可驚  
心體易龐四海同文君莫懼好乘殘月下吳江  
離合偏旁互轉移古來六體亦如斯巧於葉上蟲  
爲篆不數溝中蚓作之九點蒼煙多墨跡五更殘

月沁詩脾可憐天上隨陽鳥猶勝人間沒字碑  
稻梁謀拙羽毛微難共牛腰卷軸肥界破秋雲青  
已殺銜來蘆荻白堪飛欲題哀怨無銀管好寫相  
思寄鐵衣自落慈恩成雁塢雖留淡墨亦依稀  
裂帛飛來北海廬單鳴猶宿不成書畫前有字江  
山影天上修文翰墨儲聯絡只愁風掣半虛無不  
患火焚餘無端雁塢遭人盜竹簡鑽殘老蠹魚  
殷浩書空點畫無雪中鴻爪示相符不將綠字誇  
青鳥豈以丹書附赤鳥風定懸針行每直月明垂

露勢恒孤臨池應取天台蕩灑汁無勞肘後壺  
行伍縱橫態不齊掃雲愛向碧空題補亡莫笑鳧  
爲鶴放筆須令鶩勝雞漢武金莖研更好盧仝月  
蝕寫還迷試看字挾飛鳴勢始信磨崖枉用梯  
墨蹟凌雲古折釵不同俗筆費安排來禽舊帖重  
教印瘞鶴新銘未許埋路近龍門遷續史籀呈鴟  
尾帝修齋碧天搖曳無人識錯認星文炳泰階  
廣寒亦愛玉樓才照見傭書夜訴哀世守雁門多  
筆塚疇同羽化署雲臺煙輕曳尾波三折露重藏

鋒幅半開却笑經天多一字不勞隔紙費思猜  
瀟湘秋怨徹清旻魚貫珠聯斷續勻兄弟皆工王  
大令雌雄不辨衛夫人誰言蘆管難爲筆自署霜  
奴懶作賓若遇衡陽相識伴平安二字寫須真  
剪斷高秋一幅雲生綃揮洒似羊裙絕勝鸚鵡能  
符檄不學蟲魚飽典墳離恨暗傳湘水使郵筒直  
寄洞庭君報章想爲牛郎婦自訴年年屢失羣  
一聯秋怨掛長門如訴能令卓氏奔自古惹愁因  
識字每當閣筆轉消魂溼痕乍抹三湘草香致應



含九畹蓀却恐悞書呼舉燭火星七月照黃昏  
數行纜整又還殘莫作傳訛亥豕看雲外嚇蹏疑  
白鶴月中紅葉寄青鸞少陵詩怨無家別李白詞  
悲蜀道難却爲此禽工屬藁一封書罷淚漫漫  
不勒燕然北塞山隨陽書記自工嫻學飛僅識兒  
曹字折翼何妨尼父刪倒影似題橋上柱諧聲堪  
嚇洞中蠻若非文字能傳信寅夜緣何入漢關  
衛家六鶴識遺編行列成文體自然聯貫洛陽三  
十乘飄搖關外五千言角鷹啄影長空月黃鵠追

踪一抹煙只有照陽恩信斷千金更欲買如椽  
一線能于九萬搖山程日記遠迢迢名題鐵券雲  
中守譜寫梨園月下簫無意豎來成鶴膝偶然斜  
去作蜂腰秦灰已冷猶餘焰前路驚心是野燒  
作客長將翰墨拋顏筋柳骨是誰教偶緣繫足通  
名姓嘗恐張羅廣絕交擲筆想因悲失伍問奇聊  
復仗同胞雁行久在中書隊毛穎何妨任解嘲  
紙落昆明位置高文章分得鳳凰毛衝開宿霧囊  
中穎割取西風筆似刀路近長沙摹鵬賦飛經汨

水綴離騷叮嚀莫與洪喬寄錯認秋雲是碧濤  
十二紅樓傍夜過上林筆札暗婆娑霜明玉筍須  
青女月照銀鈎倚素娥忽地回文趨北海有時側  
勢下東坡羣飛不爲驚弦斷看取方圓大擘窠  
林端暝色有塗鴉輸與雲屏一道斜斑管題殘長  
信葉彩毫夢吐上陽花心慚曳白虛秋桂色借研  
硃帶晚霞莫學草玄投閣吏筆床安穩卧平沙  
貝葉書經有雁堂飛來南土墨花香鳥銜堪擢宏  
詞秀羽族應推正字郎淺淡一輪仙掌月淒清五

夜硯池霜此行留下斜封詔十部應須讓數行  
窮鳥何堪薦福鶩操觚猶學苦諸生雪花無處能  
呼凍天榜開時擬一鳴千古未經常侍整八門猶  
賺敵人行縱令銅雀留殘硯輸與大書爵管城  
簡斷編殘竹不青漆書天上見儀型黑雲直作龍  
賓墨赤縣橫看劍閣銘自入昭陵無秘本何緣太  
學有遺經馮夷似妬鍾王蹟故作風波阻洞庭  
書契何年代結繩顛皇亦效羽毛能金沙洗出西  
江篆鐵硯磨開北渚冰明月下時看粉本夕陽沉

後賴星燈歸心匆遽忘收拾誤認蘆花是剡藤  
綠遍蕉園去不留有時露布過南樓馳書博望窮  
河漢獻策天關犯斗牛回雁峰前詩思盡驚鴻水  
底墨花浮江河飲啄尋常事磨盾何須着意求  
雁戶由來異古今舌人辨字不同音晒經石畔飛  
應徧文選樓頭聽最淡書判絕倫登鳳閣臨摹拔  
萃譽雞林君家烏道留遺跡休羨磯頭五色禽  
岐鳳當年化及南楚書今已過江潭敢訶鶯帖應  
謠米未悉禽名合問郟形似洛書疇用九數同乾

卦畫連三六雙想為防繒繳抹月批風石隱甘  
七六文鈔老織簾景純一束付君拈天低白水窺  
毫末野曠青山見筆尖殿後聯翩如有副榻前滅  
沒豈能黏可知前路多車騎旂載飛鴻令最嚴  
東莞能書得百函看來標格異仙凡逸如列子風  
生袂淨比王恭雪滿衫顛倒寫來情脈脈依稀挑  
盡手摻摻詩成雁字燈前讀擬寄情人帶笑緘

陸瑞麟

先生字靈昭鳩峯長子璋受業師也年少能文敏

而好學苦心誦讀曲盡文情鳩峯有聽兒讀書句  
云永日呶唔思悄然此兒可喜復堪憐縈迴曲似  
江頭水嗚咽幽如隴上泉季子未懸他日印祖生  
先着少時鞭慈親絡緯遙相和媿我西牕飯後眠  
食餼三十餘年而棘闈屢躓以歲貢終子森桂康  
熙戊子舉人

橫塘古渡

輕舟比翼過橫塘柳帶榆錢映曉光山水未窮遊  
次序風花不負飲平章黃鸝乍試清和語紅粉咸

工淺淡粧六幅帆收簫鼓競長年擾擾是金閭

題翁園畫浪軒

莫釐飛瀑下金隄假道名園洞口低雨後急湍明  
月峽春分徐漲浣花溪流觴勝事山中繼枕石高  
風世外棲是處樓臺工結構遶軒活水此難齊

嚴振

振字子奇又號紫衢湖之驥村人雙林凌氏世傳針灸之術術甚秘父子授受不傳他姓紫衢為凌氏甥竟用心得其術以青囊行于太湖諸山病者輒應手愈嘗寓東山樂風土之美遂攜家焉所居濱響水澗白屋數間樹色蔭牕泉聲到枕翛然有塵外致性尤愛菊屋傍隙地手莪數十本灌溉燥溼咸得其性芟留枝蕊各具畫意風日暑雨中恒護視不倦花時張素屏煮香茗坐卧其間客至欣

然談笑終日好事者或載酒至與吳不官施佩宜  
許致遠居相近晨夕倡和真摯坦率淡於勢利年  
高德劭人咸敬之壽躋九齡所著有中流草爪雪  
集二卷詩餘一卷

古意

桃李植後園枳棘作護持同生天地間貴賤誰爲  
之自分托根薄况乏芳菲姿但得春風吹欣欣亦

自私

擬招隱

清溪何綿邈重阿信軒渠吾家當其中山水羅階  
除幸無耳目累可以樂琴書春至雜花發秋深叢  
桂舒韜光謝時譽養拙安田廬鄰里互耕作妻孥  
自樵漁時至乃有懷駕言巾我車登高念遠人出  
林望故墟美服無常榮美食無常餘何爲久羈縻  
而乃傷居諸薇蕨日以長蘿薜堪襟裾歸來共初  
服庶幾同莊樗

夜過重紹村陳君爲置酒場圃

萬事不可知生平有今夕風塵奔走歸故人畢場

場相見桑柘間殷勤慰行役道遠霜露寒慙息輪  
蹄跡開軒出綠醕呼庖製鮮鯽參差進數觴淋漓  
情以憚驚颺隴上來落月寥天碧擊筑思重陳唾  
壺碎復易君非荆高徒慷慨自夙昔人生適意耳  
栖栖亦何益

擬古

置酒臨高臺日暮歌鐘促君子適萬里叮嚀及僮  
僕僮僕非所悲感歎傷中闡與君非形影安得長  
相隨相隨或相疑而况華與夷浮雲蔽中路明月

來何時惟南山有栲惟北山有蔦歲寒苟不渝綢  
繆以終老

藹藹叢生桂結根南山陂與君本同氣非比秋蓬  
枝秋蓬各自舞兄弟無不宜悠悠四海間只此真  
相知百年而同堂歡慶良無涯豈必絲與竹間茲  
頃與篋譬彼棠棣華韡韡何常虧春風苦搖蕩形  
影相參差君誠執高詒他人亦何爲

有感

驅車適廣陌廣陌接皇州未卜去者樂但見來者

愁白楊日蕭蕭黃土無春秋惟昔侯與伯今歸松  
與楸惟昔宮與府今歸陵與坵念此感人意大塊  
喻浮漚蓬瀛遠莫至秦漢徒悠悠

落日咏懷

鄉邑渺何處落日蒼天長秋風好歸去茗溪菰米  
香故人有書來乃道田里荒蔀屋半流徙誰與充  
官倉

伐木響空林飛蓬來廣澤吾非臨邛旅落日徒四  
壁高堂苦升斗寒閨困刀尺俯仰天地間西風動

心魄

少小事流浪長大昧親故忽忽岐路旁一身等孤  
鶩落日咏停雲衰草寒煙樹涼風天未來秋波浩  
情愫

梅雨連夕二麥可憂集受采堂同張翁許丈  
次東老韻

南薰久不作溽暑蒸山林唯辛值芒種詰旦剛逢  
壬涉旬強半雨天淚何滂滂二麥漸有傷夫豈曰  
甘霖飢口方嗷嗷灾荒寧復任孰謂杞人憂爲慮



恒過淡墻東有隱士置酒呼共斟翩翩逐二老  
曳履同過尋嘉會固非易古道誠所欽忘憂  
須痛飲紀事宜長吟庶幾唐風篇良士存規箴  
職思我何有感此淋浪音

中秋前五日社集施佩宜且適齋賦得秋聲  
秋半氣漸肅涼颼遂颼颼疎雨復間之浙瀝沿梧  
楸蕭蕭竹栢林颯颯蘆葦洲哀鴻來何多候蟲鳴  
方稠客心恒不歡聽茲矧益愁高懷南隣翁開軒  
命朋儔請洗宋玉悲一和歐陽修筆墨共瀟灑琴

樽相綢繆興會移我情況復境遇幽乃亦適其適  
欲去且更留快然曠達交可與忘春秋

古木曉行

永夜心自語徘徊起中庭村墟辨微茫耿耿見落  
星驅車東北去杳杳向寒垆淒霜無榮枝驚風鮮  
安翎回首風霜中故山空復青

敘別與紫先

東陵舉黃鵠西塞來微禽夙昔無邂逅一朝諧邱  
林雖非羽儀匹庶幾同素心時會各有適而我獨

幽沉蘭茗失其榮風雨生鳴琴縱無雲泥隔去住  
辰與參縱無海岳睽旦暮疇招尋窮途十二月懷  
袖空瑜琛何以贈君別努力崇徽音何以慰君思  
明德余所欽寒梅有嘉萼貞木多清陰去去勿復  
道落日橫前岑

種菊歌次韻答致遠

古來愛菊唯淵明予也烏能同其情偶從盆盎植  
數本未嘗有意分種名秋深作花頗不一羅置斗  
室室已盈頓使茅屋發光采雲車五色來娥英對

此悠然意自足豈必誇多鬪繁榮不見今年夏秋  
際厥初苦雨繼苦晴好事竭力營異種一朝萎蕭  
徒惋驚吾得擁花稱老圃奚羨司稼為農卿破鐙  
煮茗琴作枕雅歌起舞神長清不須飡芳志乃潔  
不須飲液身乃輕須君載酒過籬落險韻爭押相  
研精秋容未老興未已冒雨還來期駱生

賦得秋水共長天一色

爽氣拂雲雲氣杳水光欲盡天光繞天水微茫萬  
頃連遙峯幾點青螺小天轉長河入水流水翻輕

浪極天浮蓼花楓葉空中色  
 船船漁帆鏡裏秋鏡  
 裏空中水天暮故國他鄉渺  
 煙樹欲採芙蓉寄遠  
 時還思蘭杜塞芳處落霞孤  
 鷺却何來一片蒼涼  
 忽飛破

短歌贈朱孝子羽吉

吾宗孝子廷培氏手刃父仇似鸞豕  
 青天血灑萬人場凌秋渚先生輓孝子詩有曰白日劍消千古恨青天血灑萬人場蓋孝子刃仇於演戲場也  
 中二十六年寸心是走投縣吏吏歎嗟力欲全之  
 法少弛金錢滿獄埋王章悲哉孝子竟鳩死于今

泯滅姓與名孰若朱君炳詩史朱子孝弟信可欽  
 可惜所為不為此淚盡秦庭血繼之莫為遺骸辨  
 青紫緣知古來琇與璠一劍甘心蹶然起嗚呼朱  
 君奈若何蓬垢衰麻將沒齒君不見墨吏昧胥已  
 敗亡元兇斬祀魂隨禡又不見吾宗孝子志雖伸  
 身死囹圄復誰理

曉起對雪有懷施荔村

凍雲壓簷簷漸黑蕭蕭北風吹日沒獨宿茅齋衣  
 被單夜半寒威直侵骨淅淅時聞灑牕紙飄飄不

覺平墻闕曉來鄰語相驚呼瑤天玉宇神仙窟起  
看大地絕纖埃一縷青煙裊茶突自洗冰甌呵硯  
池蹇驢孤棹當誰謁高卧溪山避俗翁應憶前村  
梅蕊發

費蓉城爲余寫梧竹飛泉小影戲題長句  
我歷人間五十四寒暑四十二年在羈旅家世滄  
桑歲月非春花秋月悲遊子茂苑費子善丹青來  
遊金庭訪龍渚一朝置我邱壑間貌得疎慵頗相  
似有手懶逢迎有口不會語獨坐空山與世違却

背長林面流水落落乾坤何處家悠悠湖海誰知  
已問之既不應麾之那得起恍惚松風天際來滿  
身嵐翠欲飛迴卷之欲還還復開費子費子胡爲  
哉何不水邊石畔添亭臺何不蘭畦菊徑相徘徊  
何不寫爲皮陸侶何不畫爲嵇阮儕何不虎溪蓮  
社宗與雷天台日暮採芝回不然元方亦可侍鹿  
門亦宜偕胡爲乎木石兮與居幕天席地水雲涵  
蕩兮魚鳥無親梧竹幽深兮樵牧不至將身世之  
兩忘抑違時而世棄咄哉費蓉城不獨摹神移我

情絕壑重巒在尺幅長空浩蕩歸雙目古人縮地  
有神術君於筆底偏能得君不聞萬事不如杯在  
手人生樂事無過酒安得壺公一粒丹點此奔瀾  
飛瀑成紅友東坡瓢謫仙斗卷中之人今為君起  
舞開笑口

同竹谿晚過月先亭飲桂下偶成  
曲曲平橋短短廊小山溪處富天香夕陽雖與黃  
昏近近水亭先好月光且坐定莫歸忙碧梧修竹  
間垂楊天半胸懷秋半景口中珠玉掌中觴放眼

浮雲都過盡一天星斗映池塘

香花甲歌為施佩宜賦

山阿玉暖青苗長山庖留客春風香晶鹽一點空  
百味尊芹何物堪同堂主人謂是香花甲小槽壓  
酒尤堪酌白綴疎花雪色明碧翻嫩葉雲光薄嗚  
呼雲光雪色生幾時今遇幽人始見知我將續騷  
廣藥譜與子延年而永思又將擷翠漱芳日復日  
丹崖碧澗環吾室

四明邱氏草堂古松柏歌

眼前之木誰棟梁邱氏庭前三本強徂徠新甫森  
相望青天萬里風濤長虬龍天矯吼空蒼拂拭昭  
回生輝光碧雲動地琴書涼流膏薦鼎花泛漿客  
但能來咏且觴醉歌一枕傲羲皇曛曉曉日疑扶  
桑仙人手澤冰霜香宋元明季多傾亡曷不取之  
支明堂嗚呼曷不取之支明堂

山回秋水芙蓉怨

芙蓉花香滿渚少婦浣紗向秋水睡熟鴛鴦不避  
人交頸雙雙斜日裡懊儂歸來懶上機西風吹機

亂絲縷含情又恐誤征衣芙蓉花香滿渚明日爲  
君還蚤起

弟起歸娶遂侍老母留居草堂余仍北渡五  
湖作詩勉別

一自爲孤子天涯十四年可憐無舊物猶記授遺  
編海雁蕭蕭影江蓀淡淡煙相依忽散處腸斷老  
親前三

久客非吾意今歸覺弟難薄田饘粥少虛室夢魂  
寒流水雖難問浮雲亦可觀高堂欣得婦蚤晚報

加餐水穀難問壽雲衣百轉高堂知幾歲  
入客雜題和人韻費東華舊田餘謝火盡空  
冰雪三冬暮煙雲四壁虛不平徒有歎能事豈關  
書鷗鷺身空似漁樵計弗如賤貧真我分骯髒未  
須除  
歲月雙芒屨湖山一藥囊交親多晚節遲暮獨他  
鄉往事青衫溼雄心紫電光烏程寒露酒不醉可  
能忘

墨菊

寄傲東籬下高人亦寫真筆爭秋氣老霜趁墨痕  
新盈把堪誰贈含芳若我親悠然蓬壁裏相對足  
怡神

送王甫瞻

此去終何托煙波又一航布袍霜氣肅詩鬢歲寒  
蒼作客原蕭瑟逢人亦渺茫玉峯歸計定歌哭任  
家鄉  
我亦悲羈旅君歸樂歲華親朋多古道詩酒一天  
涯白雁音書促青山事業賒五湖人漸老誰與話

浮家

貧病相憐意論交况客中一談忘旦夕數見喜兒

童藥熟青燈黑衣寒碧荔紅後遊知未倦湖上待

春風

記取禽魚好還憐山水幽夕陽黃葉寺春雨綠莎

洲愛客非無主

翁摺三席  
獻臣昆季

敲詩亦有儔

止白遺  
送谷二師

君臨古渡情共水悠悠

秋海棠和許子雲

無限悲秋意墻陰古砌中命同紅粉薄色共彩雲

空歌哭憑寒嚶淒涼逼露叢自憐開不早誰與怨

西風

翠淨娟娟葉紅鮮裊裊枝何人堪比艷有客為題

詩小砌疎牕外清秋細雨時似啼還似笑幽意豈

無知

東老受采堂看菊次致遠韻

閒情一以寄種種極幽妍瘦影都如畫生機別有

天賞宜遶客共開為餞秋全

次日  
立冬

晚節期相晦芳

名不用傳



東老攜樽同赴遺公噉笋之約

王版來叅處良朋盡日同綠陰蓮社地紅雨麥秋  
風塵拂多玄解爐鎚有化工香林添韻事開禁爲  
陶公東坡受采堂香蔭火好煎

無味春盡日與東老小飲花前用前韻

轉盼皆陳迹閒情且復同春光三月梅花片一庭  
風市酒賒常薄庸詩改不工相知莫相笑無事得  
如公

望好翁子琢山景想有年頃來訪菊始得面晤蒙

贈詩四章及衡遊懷人諸刻步韵奉酬

濩落真堪笑名山久索居術慙三世業學欠十年  
書拙朴交因寡衰慵禮益疎如何君子步肯過野  
人廬

僻巷門雖設虛檐鵲不喧誰傳秋菊好爲屈雅人  
尊語見肝腸雪形忘髮鬢髡十年真企想一坐席  
寧溫  
正惜匆匆別何妨得得來清泉應自煮晚菊爲君  
開霞蔚登衡賦風淒擊筑裁一時都贈我心醉勝

千杯酒盡滿湖風寒  
足跡半天下胸襟絕點塵君寧非國士我未免鄉

人後勁言猶在季霖先生嘗言吾家後勁其在斯人西來意甚親吟

和尚每謂琢山智籬花分愛去晚節共芳鄰風

慧非常是有夙根

一身為客萬花天紅雨柴門足醉眠瑤草已忘安

漢策碧桃曾許避秦緣漆園春色輸蝴蝶錦水歸

心寄杜鵑寂寂江南寒食路幾家山井禁朝煙

無題

春風寒透紫駝尼正是朱門欲暮時楚國浪傳雲

雨夢江南又進鷓鴣詞梅花自許香為塢楊柳誰

教綠作絲試喚銀燈尋故事新紅剛到海棠枝

鐵馬

五色鸞鑣驟彩雲醉鄉深處可曾聞簷風若長悲

鳴價櫳月空憐蹠躑羣萬里沙場驚夢斷六開天

廐許名分將軍莫認香閨物亦有相從戰伐勲

湖航呈顧君

五湖南去片帆輕雁鶩薰葭記水程巨浪未能平

七十二峯

寓公

卷八十

慷慨中流安得見澄清夕陽紅樹伊人遠隔岸青  
山故國情無那孤行憂寂歷與君相伴到桐城

晚渡笠澤歸苕泊南湖

朔氣寒侵遊子衣五湖煙水暮霏微拋他未忍唯  
山色催我難堪是夕暉鄉土久違蹊徑忘親隣多  
故屋廬非漁翁莫訝來何晚羨爾菰蘆尚有磯

送邱梅仙還四明

最愛錢塘隔水山鑑湖今日羨君還心同賀監人  
難繫詩到邱為我莫攀風月青衫雙袖改煙波華

髮幾莖斑他年浪迹重相見只在乾坤五嶽間

憶弟

五湖雲水接茸城去住寧關手足輕亂後烏衣愁  
老大貧來黃卷失聰明鵲鴿原上三年別鴻雁天  
邊兩日程近報欲歸歸未得春風花萼重含情

送孀妹歸

滿船風露溼麻衣此去仍甘守竹扉三載食貧心  
力盡兩孩依命歲華非溪頭機杼嚴燈火雪裡厨  
庖冷蕨薇兄弟天涯俱薄劣幾時門戶起衰微

歲暮旅懷

茅堂只在雪川濤，旅食空江歲復陰。  
夜枕每生離別夢，風帆不定往來心。  
蘆花輕暖輸溪女，菰米甘香付水禽。  
何日得歸流亂裡，白頭慰藉鼓鼙音。  
包山東北館娃宮，千古風流記此中。  
高士去來閭里在，美人別後水煙空。  
斜陽倒影開鼉窟，寒谷生雲護虎叢。  
夷險已更遲暮逼，可堪名勝老梁鴻。  
白露蒼蒹水一涯，空山遙見雁行斜。  
騰驤士馬方千里，耆舊東南尚幾家。  
我客只今傷歲暮，爾歸何

事待春華蕭騷中，澤渾難止力盡寒雲落遠沙。  
不信江湖遠九重，可憐宵旰在兵農。  
風雷十月非無爲，水旱三年已告凶。  
落日煙波疑估舶，窮年閭巷苦尸饔。  
天涯久慣簞瓢冷，此際糟糠意轉濃。  
閒居雜詠和致遠

江村春事已消除，滿院飛花數卷書。  
自覺晚餐堪當肉，安知吾樂不如魚。  
風清一榻科頭蚤，雨散羣峯放眼餘。  
靜聽南薰移物候，渚蒲畦艾綠齊舒。  
半山流水答鳴琴，大樹涼生滿地陰。  
父老閒能談

揖讓漁樵原未識冠簪風軒鬪茗時分乳露井浮  
瓜晚鎮心自笑熟緣應得盡袁劉河朔豈須尋  
隔宵殘暑尚宜瓜滿架輕颺落豈花元氣淒涼天  
北極練裙憔悴客西華愁多未補平生事見晚空  
貽末路嗟八月江南鴻雁蚤秋聲先入旅人家  
霜晨不厭起徐徐芸館秋香老蠹魚近得物情終  
寂寞拙于世法轉蕭疎曲籬蓬華苦間架故國丁  
夫急羽書笑語黃花還自慰與君端足伴閒居

紅葉

一曲清商變綠叢林光又自艷西風可知造化還  
丹巧絕勝官家剪綵工蜀道霜濃晨燹映吳江秋  
冷暮霞同行入莫愛停車看多少園陵夕照中

清夜

滿簾疎影一庭香丹桂梧桐共晚涼紙帳夢回秋  
似洗草堂人靜月如霜何時絡緯還成疋此際櫬  
檣尚有光惆悵不堪殘醉醒十年情事集中腸

送甫瞻過嶺不覺遂抵山居

夕陽堪送不堪留行盡山腰過嶺頭百歲幾逢今

日樂半生同歎此身浮雲崖樓閣高低畫烟水峯  
巒遠近鷗一舫即教君易買王子有擬買一舫作  
浮家計不得之作  
可能易別此丹印

小春雨後弟北行夜寒有懷

聽盡鷄聲與雁聲霜華直透紙幃明因憐矮屋茅  
簷淺為念孤舟布被輕遠道關河書不易歲寒兄  
弟別何情留行不及連朝雨却願長途白日晴

古意

孤枕繡雙鴛文衾疊香絮夢聽風雨多江南行不

去

冰雪丈人

梅

丈人何清癯深山笑冰雪但得與之親夢魂亦高

潔

懷素子 水仙

置子木石居恍與水雲遇我亦素心人莫便凌波

去

即景

一村紅雨綠雲環缺入清溪更補山芳艸踏成沽

酒路夕陽喧動打魚灣  
月夜自吳門歸東山

綠水橋邊酒旆青芙蓉城郭遠山屏多情只有西  
江月直照歸人到洞庭

看劍

十丈寒光練影沉華陰赤土動陰森秋風莫暗笑  
蓉鏢留照荆卿一片心

題山村晚步小幅

宛轉溪橋橫獨木天斜逕路遶三叉低徊豈是迷

津者貪看芙蓉一岸花





